

廣平府志

ル 5
1572
17



八五
1372
17



重修廣平府志卷四十六

列傳一 周至北魏

周

牛贊史記作翦趙人國策鮑彪注事武靈王王破原陽以為騎邑

贊進諫曰國有固籍兵有常經變籍則亂失經則弱且習其兵者輕其敵便其用者易其難今民便用而王變之是損君而弱國也故利不百者不變俗功不什者不易器今王破卒散兵以奉騎射臣恐其攻獲之利不如所失之費也王曰古今異利遠近易用今子以官府之籍亂寡人之事非子所知贊再拜稽首曰臣敢不聽令

重修廣平府志 卷四十六 列傳一 周至北魏 一

王遂胡服策國二十一年攻中山贊將車騎合軍曲陽攻

取丹邱華陽鳴之塞史記世家

肥義趙人元和姓纂引國策趙肅侯薨武靈王少及聽政先問

肥義加其秩國三老年八十月致其禮武靈王十九年

史記世家王平晝閒居肥義侍坐曰王慮世事之變權甲兵

之用念簡襄之迹計胡狄之利乎王曰夫有高世之功

者必負遺俗之累有獨知之慮者必被庶人之恐今吾

將胡服騎射以教百姓而世必議寡人矣義曰臣聞論

至德者不和於俗成大功者不謀於眾昔舜舞有苗而

禹袒入裸國非以養欲而樂志也欲以論德而要功也

愚者暗於成事智者見於未萌王其遂行之王遂胡服

策國二十七年立王子何為王是為惠文王肥義為相國

傅王武靈王自號為主父惠文王三年封長子章為代

安陽君使田不禮相章李兌謂肥義曰公子章彊壯而

志驕黨眾而欲大殆有私乎田不禮之為人也忍殺而

驕二人相得必有陰謀子奚不稱疾毋出義曰不可昔

者主父以王屬義也曰毋變而度毋異而慮堅守一心

以歿而世義再拜受命而籍之子則有賜而忠我矣雖

然吾語在前終不敢失兌曰諾子勉之異日肥義謂信

期案即高信曰公子與田不禮甚可憂也吾聞之奸臣在朝

重修廣平府志 卷四十六
國之殘也讒臣在中主之蠹也此人貪而欲大內得主而外爲暴矯令爲慢以擅一旦之命不難爲也禍且逮國吾憂之夜而忘寐盜賊出入不可不備自今有召王者必見吾面我將以身當之信期曰善哉吾得聞此也四年主父及王遊沙邱異宮章與田不禮作亂詐以主父令召王肥義先入殺之

史記世家

趙勝趙之諸公子也諸子中勝最賢喜賓客賓客蓋至者數千人平原君相趙惠文王及孝成王三去相三復位封於東武城平原君家樓臨民家民家有躡者繫散行汲平原君美人臨見大笑之明日躡者至平原君門

請曰臣不幸有罷癘之病而君之後宮臨而笑臣臣願得笑臣者頭平原君笑應曰諾躡者去平原君終不殺居歲餘賓客門下舍人稍稍引去者過半平原君怪之曰勝所以待諸君者未嘗敢失禮而去者何多也門下一人前對曰以君爲愛色而賤士士卽去耳於是平原君乃斬笑躡者美人頭自造門進躡者因謝焉其後門下乃復稍稍來是時齊有孟嘗魏有信陵楚有春申故爭相傾以待士虞卿欲以信陵君之存邯鄲爲平原君請封公孫龍聞之以爲不可且曰虞卿操其兩權事成操右券以責事不成以虛名德君君必勿聽也遂不聽

平原君以趙孝成王十五年卒子孫代後竟與趙俱亡

史記
列傳

藺相如趙人爲趙宦者令繆賢舍人惠文王時得楚和氏璧秦昭王聞之使人遺王書願以十五城請易璧王與廉頗諸大臣謀計未定求人可使報秦者未得繆賢曰臣舍人藺相如可使於是王召見問相如曰秦王以十五城請易寡人之璧可予不相如曰秦疆而趙弱不可不許王曰取吾璧不與我城奈何相如曰秦以城求璧而趙不許曲在趙趙予璧而秦不予趙城曲在秦均之二策甯許以負秦曲王曰誰可使者相如曰王必無

人臣願奉璧往於是遂遣相如奉璧西入秦秦王坐章臺見相如相如奉璧奏秦王大喜相如視秦王無意償趙城乃前曰璧有瑕請指示王王授璧相如因持璧卻立倚柱怒髮上衝冠謂秦王曰大王欲得璧使人發書至趙王趙王悉召羣臣議皆曰秦貪負其疆以空言求璧償城恐不可得議不欲予秦璧臣以爲布衣之交尚不相欺况大國乎且以一璧之故逆疆秦之驩不可於是趙王乃齋戒五日使臣奉璧拜送書於庭何者嚴大國之威以修敬也今臣至大王見臣列觀禮節甚倨臣觀大王無意償趙王城邑故臣復取璧大王必欲

急臣臣頭今與璧俱碎於柱矣秦王恐其破璧乃辭謝
因請召有司按圖指從此以往十五都與趙相如度秦
王特以詐佯爲予趙城實不可得乃謂秦王曰和氏璧
天下所共傳寶也趙王送璧時齋戒五日今大王亦宜
齋戒五日設九賓於庭臣乃敢上璧秦王度其終不可
彊奪遂許之五日後乃設九賓禮於庭引趙使者藺相
如相如至謂秦王曰秦自穆公以來二十餘君未嘗有
堅明約束者也臣誠恐見欺於王而負趙故令人持璧
歸閒至趙矣且秦彊而趙弱大王遣一介之使至趙趙
立奉璧來今以秦之彊而先割十五都予趙趙豈敢留

璧而得罪大王乎臣知欺大王之罪當誅臣請就湯鑊
唯大王與羣臣熟計議之秦王與羣臣相視而嘻因而
厚遇之使歸趙相如旣歸趙王以爲賢拜爲上大夫明
年趙王與秦王會澠池秦王飲酒酣曰寡人竊聞趙王
好音請奏瑟趙王鼓瑟秦御史前書曰某年月日秦王
與趙王會飲令趙王鼓瑟藺相如前曰趙王竊聞秦王
善爲秦聲請奉盆缶秦王以相娛樂秦王怒不許於是
相如前進缶因跪請秦王秦王不肯擊相如曰五步之
內相如請得以頸血濺大王矣於是秦王不憚爲一擊
缶相如顧召趙御史書曰某年月日秦王爲趙王擊缶

秦之羣臣曰請以趙十五城爲秦王壽相如亦曰請以秦之咸陽爲趙王壽秦王竟酒終不能加勝於趙既罷歸國以相如功大拜爲上卿位在廉頗之右廉頗宣言曰我見相如必辱之相如聞不肯與會相如每朝時嘗稱病不欲與廉頗爭列已而相如出望見廉頗相如引車避匿於是舍人相與請辭去相如固止之曰公之視廉將軍孰與秦王曰不若也相如曰夫以秦王之威而相如廷叱之辱其羣臣相如雖駑獨畏廉將軍哉顧吾念之彊秦之所以不敢加兵於趙者徒以吾兩人在也今兩虎共鬪其勢不俱生吾所以爲此者以先國家之

急而後私讎也廉頗聞之內袒負荆因賓客至藺相如

門謝罪曰鄙賤之人不知將軍寬之至此也卒相與驩

爲刎頸之交

史記列傳

公孫龍趙人

列子

爲平原君客空雄之遇秦趙相與約曰

自今以來秦所欲爲趙助之趙所欲爲秦助之亡何秦攻魏趙欲救之秦使讓趙曰秦欲攻魏而趙助之非約平原君以告龍龍曰亦可發使讓秦曰趙欲救之秦獨不助趙非約趙惠王謂龍曰寡人事偃兵十餘年矣而不成兵不可偃乎龍曰偃兵之意兼愛天下之心也不可以虛名必有其實今藺離石入秦而王縞素出總東

攻齊得城而王加膳置酒秦得地而王出總齊亡地而王加膳本非兼愛之心也此偃兵之所以不成也今有人無禮慢易而求敬阿黨不公而求令煩號數變而求靜暴戾貪得而求定雖黃帝猶若困龍又說燕昭王以偃兵昭王曰甚善願客計之龍曰竊意大王之弗為也王曰何故曰日者大王欲破齊諸天下之士欲破齊者大王盡養之知齊之險阻要害君臣之際者大王盡養之雖知而弗欲破齊者大王猶若弗養其卒果破齊以為功今大王曰我其偃兵諸侯之士在大王之朝者盡善用兵者也臣是以知大王之弗為也呂氏春秋龍疾名實

之散亂為守白之論謂白馬非馬公孫龍子與孔穿辨臧三

耳詞勝於理孔叢子鄒衍過趙言至道乃絀龍史記後乘白

馬無符傳欲出關關吏不聽新論

李同案正義名談邯鄲傳舍吏子秦圍邯鄲急李同說

平原君曰君不憂趙亡也平原君曰趙亡則勝為虜何為不憂乎李同曰邯鄲之民炊骨易子而食可謂急矣而君之後宮以百數婢妾被綺縠餘梁肉而民褐衣不完糟糠不厭民困兵盡或剡木為矛矢而君器物鐘磬自若使秦破趙君安得有此使趙得全君何患無有今君誠能令夫人以下編於士卒之間分功而作家之所

有盡散以饗士士方其危苦之時易德耳於是平原君

從之得敢死之士三千人李同遂與三千人赴秦軍秦

軍為之卻三十里會楚魏救至秦軍遂罷邯鄲復存李

同戰死封其父為李侯史記平原君傳

茅舉姚氏本趙人國策鮑彪注趙使姚賈約韓魏韓魏友之

故友之將使王逐之而已因受之今王逐之是韓魏之

欲得而王之忠臣有罪也故王不如勿逐以明王之賢

而折韓魏之招國策

慎到趙人學黃老道德之術因發明序其指意故著十

一二論史記又有慎子四十二篇漢書列傳

毛公薛公皆趙處士毛公藏於博徒薛公藏於賣漿家

魏公子無忌既竊兵符矯殺晉鄙以存趙遂留趙欲見

兩人兩人自匿不肯見公子聞所在乃閒步往從此兩

人游甚歡平原君恥之公子曰無忌自在大梁時嘗聞

此兩人賢至趙恐不得見以無忌從之游尚恐其不我

欲也今平原君乃以為羞其不足從遊乃裝為去平原

君免冠謝固留公子及秦伐魏魏王使使往請公子公

子誠門下有敢為魏王使通者死毛公薛公往見公子

曰公子所以重於趙名聞諸侯者徒以有魏也今秦攻

魏魏急而公子不恤使秦破大梁而夷先王之宗廟公
子當何面目立天下乎說未及卒公子立變色告車趨
駕歸救魏遂率五國之兵破秦軍於河外追至函谷而

還史記

荀况趙人卿者時人相尊而號為卿也

史記索隱

年五十始

來游學於齊騶衍之術迂大而閎辯爽也文具難施涸
于髡久與處時有得善言故齊人頌曰談天衍雕龍奭
災轂過髡田駢之屬皆已死齊襄王時荀卿最為老師
齊尚修列大夫之缺而荀卿三為祭酒焉齊人或讒荀
卿荀卿乃適楚而春申君以為蘭陵令史記客說春申君

曰湯以亳武王以鎬皆不過百里以有天下今荀子天

下賢人也君籍之以百里勢臣竊以為不便春申君於

是使人謝荀子荀子去之趙趙以為上卿客又說春申

君曰今荀子天下賢人也君何辭之春申君於是又使

人請荀子荀子為書謝之

國策

荀卿嫉濁世之政亡國亂

君相屬不遂大道而營於巫祝信譏祥鄙儒小拘如莊

周等又滑稽亂俗於是推儒墨道德之行事興壞序列

著數萬言而卒葬蘭陵

史記

案史記春申君死荀卿

荀卿去楚之趙豈後復歸於蘭陵耶

龐煖趙人鶚冠弟子有龐子二篇又劇辛故居趙

案索隱云

趙有劇孟劇辛與龐煖善己而亡走燕燕見趙數困於秦廉頗

去令龐煖將欲因趙弊攻之問劇辛辛曰龐煖易與耳

燕使劇辛將擊趙趙使龐煖擊之取燕軍二萬殺劇辛

鵲冠子參史
記燕世家

漢

毛萇趙人傳詩後漢書為河間獻王博士漢書即小毛公也

初魯人大毛公為詩訓詁傳於其家獻王表而出之遂

以萇為博士鄭譜或曰後官北海相云張華博物志案

其學術淵源於卜子夏每說詩獻王悅之詩傳盛行於世謂之毛詩鄭康成為之箋齊魯詩俱亡韓詩亦失傳

惟毛詩立於學宮唐太宗時從祀孔廟宋真宗時追封樂壽伯

賈公趙人受左氏訓詁於賈誼為河間獻王博士子長

卿為蕩師古曰音湯陰令以授清河張禹而復受詩於同國

毛公漢書

張禹清河人受左氏於賈長卿授尹更始與蕭望之同

時為御史望之為太子太傅薦禹於宣帝徵禹待詔未

及問會疾死漢書

胡常字少子清河人受古文尚書於膠東庸生受穀梁

春秋於尹更始為博士部刺史又傳左氏毛詩王莽時

諸學皆立漢書

房植清河人順帝時以將作大匠李固薦與陳留楊倫

河南尹存東平王暉陳國何臨同日徵用

後漢書李固傳

後官

河南尹有重名鄉人爲之謠曰天下規矩房伯武

後漢書黨

錮傳

李雲字行祖甘陵人性好學善陰陽初舉孝廉再遷白

馬合桓帝延熹二年誅大將軍梁冀而中常侍單超等

五人皆以誅冀功並封列侯專權選舉又立掖庭民女

亳氏爲皇后數月間后家封者四人賞賜巨萬是時地

數震裂衆災頻降雲素剛憂國將危心不能忍乃露布

上書帝得奏震怒下有司逮雲詔尙書都護劍戟送黃

門北寺獄使中常侍管霸與御史廷尉雜考之時宏農

五官掾杜衆傷雲以忠諫獲罪上書願與雲同日死帝

愈怒遂并下廷尉大鴻臚陳蕃上疏救太常陽秉洛陽

市長沐茂郎中上官資並上疏請雲帝恚甚有司奏以

爲大不敬詔切責時帝在濯龍池管霸奏雲等事霸詭

言曰李雲野澤愚儒杜衆郡中小吏出於狂戇不足加

罪帝謂霸曰帝欲不諱是何等語而常侍欲原之邪顧

使小黃門可其奏雲衆皆死獄中後冀州刺史賈琮使

行部過祠雲墓刻石表之

後漢書列傳

沮授廣平人少有大志多權略冀州牧韓馥表爲騎都

尉

魏志袁紹傳注

初平二年馥將以州讓袁紹授與長史耿武

別駕閔純諫曰冀州帶甲數萬穀支十年紹孤客窮軍譬如嬰兒在股掌之上絕其哺乳立可餓殺奈何欲以州與之馥不從紹至以授爲別駕尋表爲奮武將軍使監護諸將興平二年冬李傕等脅獻帝幸曹陽授說紹曰將軍累葉台輔世濟忠義今朝廷播遷宗廟殘毀而諸州郡外託義兵內實相圖未有憂存社稷恤人之意若西迎大駕卽宮鄴都挾天子而合諸侯稽士馬以討不庭誰能禦之紹將從其計郭圖滄于瓊止之授曰若不早定必有先之者焉紹竟不從紹欲立少子尙傳嗣授進諫紹不納既并公孫瓚欲出攻許授言師出歷年

百姓疲敝宜先遣使獻捷天子務農逸人若不得通乃表曹操隔我王路然後進屯黎陽漸營河南分遣精騎抄其邊鄙如此可坐定也郭圖審配勸紹行授復言操奉迎天子建宮許都今舉師南向於義則違且操法令行士卒練非公孫瓚可比也竊爲公懼之圖等力勸紹行且譖授權太盛乃分授所統爲三都督而師卒未果行五年紹決策攻許授會其宗族散資財以與之且曰此揚雄所謂六國蚩蚩爲羸弱姬也操旣斬紹將顏良紹渡河壁延津南授臨船而歎遂以疾退紹不許復省其所部并屬郭圖操復斬紹將文醜授言北兵雖衆而

勁果不及南軍利緩師南軍穀少利速戰宜持久以困之紹不從遂敗授爲操軍所執乃大呼曰授不降也爲所執耳操見授與語欲用之授曰叔父母弟懸命袁氏若蒙公靈速死爲福操竟赦而厚遇焉授尋歸袁氏遂

遇害

後漢書
袁紹傳

三國

劉劭字孔才廣平邯鄲人建安中爲計吏詣許太史上言正旦當日蝕劭時在尚書令荀彧所坐者數十人或云當廢朝或云宜卻會劭曰禮記曰諸侯旅見天子及門不得終禮者四日蝕在一然則聖人垂制不爲變豫

廢朝禮者或災消異伏或推術謬誤也或善其言敕朝會如舊日亦不蝕拜太子舍人遷祕書郎黃初中爲尙書郎散騎侍郎受詔集五經羣書以類相從作皇覽明帝卽位出爲陳留太守敦崇教化百姓稱之徵拜騎都尉遷散騎常侍時聞公孫淵受孫權燕王之號議者欲留淵計吏遣兵討之劭以爲昔袁尙兄弟歸淵父康康斬送其首是淵先世之效忠也所聞虛實未可審知宜加寬貸使有以自新後淵果斬送權使張彌等首劭嘗作趙都賦明帝美之詔劭作許都洛都賦時外興軍旅內營宮室劭作二賦皆諷諫焉青龍中吳圍合肥時東

方吏士皆分休征東將軍滿寵表請中軍兵并召休將士須集擊之劭議以爲賊衆新至心專氣銳寵以少人自戰其地若便進擊不必能制寵求待兵未有所失也以爲可先遣步兵五千精騎三千揚聲進道震曜形勢騎到合肥疏其行隊多其旌鼓曜兵城下引出賊後擬其歸路要其糧道賊聞大軍來騎斷其後必震怖遁走不戰自破賊矣帝從之兵比至合肥吳果退還時詔書博求衆賢散騎侍郎夏侯惠薦劭曰伏見常侍劉劭深忠篤思體周於數凡所錯綜源流宏遠故性實之士服其平和良正清靜之人慕其元虛退讓文學之士嘉其

推步詳密法理之士明其分數精比意思之士知其沈深篤固文章之士愛其著論屬辭制度之士貴其化略較要策謀之士贊其明思通微臣以爲若此人者宜輔翼機事納謀帷幄當與國道俱隆非世俗所常有也惟陛下垂優游之聽使劭承清閑之歡得自盡於前則德音上通輝耀日新矣正始中賜爵關內侯凡所撰述法論人物志之類百餘篇卒贈光祿勳子琳嗣

魏志列傳

朱靈字文博清河人初爲袁紹將魏太祖征陶謙紹使

將三營助戰有功遂留不去

畿輔通志

所將士卒皆隨靈

留太祖旣平冀州遣靈將新兵五千人騎千匹守許南

戒之曰冀州新兵數乘寬緩暫見齊整意甚快快卿善以道寬之不然即有變靈至陽翟中郎將程昂等果反靈斬昂以聞太祖手書曰昔鄧禹中分光武軍西行而有宗歆馮愔之難後將二十四騎還洛陽禹豈以是滅損哉來書懇惻引過未必如所云也靈為將名亞徐晃等文帝即位封郇侯靈謝曰高唐宿所願乃更封高唐侯薨諡曰威子術嗣魏志徐晃傳參傳注

張揖清河人著埤倉廣雅古今字詁究諸埤廣綴拾遺漏增長事類抑亦於文為益者然其字詁方之許慎篇古今體用或得或失矣陳留邯鄲淳亦與揖同時博古

開藝特善倉雅許氏字指八體六書精究閑理有名於

揖

魏志江式傳

案張揖舊志誤列北魏今據正史移改

王經字彥偉清河人

畿輔通志

與高陽許允善俱稱冀州

名士初為魏江夏太守大將軍曹爽附絹二十四匹令交市於吳經遂棄官歸其後復起歷二州刺史為司隸校尉辟河內向雄為都官從事甘露中為尚書帝見威權日去不勝其忿欲自率宿衛討司馬昭召經告之經諫曰昔魯昭公不忍季氏敗走失國為天下笑今宿衛空闕兵甲寡弱陛下何所資用而一旦如此毋乃欲除疾

而更深之邪禍殆不測宜見重詳帝不從遂及難太后
下令收經及其家屬送廷尉經母顏色不變笑謂經曰
以此并命何恨之有遂皆死之故吏向雄哭之甚哀晉
太始元年以經守志可嘉賜經孫郎中

魏志夏侯元傳注參少帝紀注

資治通鑑

晉

程衛字長元廣平曲周人少立操行彊正方嚴劉毅聞
其名辟為都官從事毅奏中護軍羊琇犯憲應死武帝
與琇有舊乃遣齊王攸喻毅毅許之衛正色以為不可
徑自馳車入護軍營收琇屬吏考問陰私先奏琇所犯

狼籍然後言於毅由是名振遐邇百官厲行遂辟公府

掾遷尚書郎侍御史在職皆以事幹顯補洛陽令歷安

定頓邱太守所莅著績卒於官

晉書列傳

李遼清河人父回綏當雲擾時據有邦邑太元元年歸

晉遣遼奉表路經闕里慨其廟庭傾頓達京表求興復

建講學十四年敕下魯郡營飭遼出家布助工廟成蠲

復數戶供埽灑并給六經講習庠序延宿儒集後進遼

力居多

康熙志

劉遐字正長廣平易陽人性果毅便弓馬開豁勇壯值
天下大亂遐為塢主每擊賊率壯士陷堅摧鋒冀方比

重刊廣平府志 卷四
之張飛關羽鄉人冀州刺史邵續深器之以女妻焉遂
壁於河濟之間賊不敢逼遐間道遣使受元帝節度朝
廷嘉之璽書慰勉以爲龍驤將軍平原內史建武初元
帝以遐爲下邳內史將軍如故初沛人周堅一名撫以
彭城叛石勒遣騎援之詔遐領彭城內史與徐州刺史
蔡豹泰山太守徐龕共討撫戰於寒山撫敗走詔徙遐
爲臨淮太守徐龕復反事平以遐爲北中郎將兗州刺
史太甯初自彭城移屯泗口王含反遐與蘇峻俱赴京
都事平以功封泉陵公遷散騎常侍監淮北軍中郎將
徐州刺史咸和元年卒追贈安北將軍子肇年幼成帝

以徐州授郗鑒以郭默爲北中郎將領遐部曲遐妹夫
田防及遐故將史迭卞咸李龍等不樂他屬共立肇襲
遐故位以叛成帝遣郭默等率諸郡討之遐母妻子參
佐將士悉還建康肇襲爵官至散騎侍郎

晉書
列傳

黃浚字始長魏郡斥邱人父沈善天文秘術浚從父受
業精妙踰深兼博覽經史尤明禮易性忠勤非禮不動
永嘉之亂與渤海高瞻避地幽州說瞻曰王浚昏暴終
必無成宜思去就以圖久安慕容廆法政修明虛懷引
納且讖言真人出東北儻或是乎宜相與歸之同建事
業瞻不從浚乃率宗族歸廆廆待以客禮引爲參軍軍

國之務動輒訪之。法止說成敗事，皆如言。庾常曰：黃參軍孤之仲翔也。及甄嗣位，遷左常侍，領史官，甚重之。石季龍攻甄，甄將走遼東。法曰：賊有敗氣，不過二日，必當奔潰。宜嚴勒士馬，爲追擊之備。甄曰：今寇盛如此，卿言必走，孤未敢信。法曰：殿下言盛者，人事耳。臣言必走者，天時也。胡足爲疑。及期，季龍果退。甄益奇之。及慕容儁卽王位，遷從事中郎。儁聞冉閔亂，將圖中原，訪之於法。法勸行，儁從之。及僭號，署爲進謀將軍。太史令關內侯尋加奉車都尉，西海太守，領太史，令開陽亭侯。又封平舒縣五等伯。常從左右，諮決大事。靈臺令許敦害其寵。

諂事慕容，評設異議以毀之。乃以法爲太史，靈臺諸署統加給事中。法待敦彌厚，不以毀己易心。慕容暉敗，以老歸家，歎曰：燕必中興，其在吳人。恨吾年過不見耳。年九十七卒。卒後三年，僞吳王慕容垂興焉。

晉書列傳

范晷字彥長，南陽順陽人。少游學清河，遂徙家居焉。郡命爲五官掾，歷河內郡丞、太守。裴楷雅知之，薦爲侍御史，調補上谷太守。遭喪不之官，後爲司徒左長史，轉馮翊太守。甚有政能，善於撫綏，百姓愛悅之。徵拜少府，出爲涼州刺史，轉雍州。於時西土荒毀，氏羌蹈藉，田桑失收，百姓困弊。晷傾心化導，勸以農桑，所部甚賴之。元康

中加左將軍卒於官二子廣雅

晉書列傳

范廣晷子字仲將舉孝廉除靈壽令不之官姊適孫氏早亡有孫名邁廣負以南奔雖盜賊艱急終不棄之元帝承制以為堂邑令丞劉榮坐事當死郡劾以付縣榮即縣人家有老母至節廣輒聽暫還榮亦如期而反縣堂為野火所及榮脫械救火事畢還自著械後大旱米貴廣散私穀振飢人至數千斛遠近流寓歸投之戶口

十倍卒於官

晉書范晷傳

范堅字子常汪之叔博學善屬文永嘉中避亂江東拜佐著作郎撫軍參軍討蘇峻賜爵都亭侯累遷尚書右

丞時廷尉奏殿中帳吏邵廣盜官幔棄市廣二子宗年十三雲年十一求自沒為奚官奴以贖父命時議者欲特聽減廣死罪堅駁之曰人之愛父誰不如宗今既居然許宗之請將來訴者何獨匪民特聽之意未見其益此為施一恩於今而開萬怨於後也成帝從之正廣死刑後遷護軍長史卒官子啟字榮期雖經學不及堅而

以才義顯於當世為秘書郎累居顯職

晉書列傳

范汪字元平雍州刺史晷之孫也父雅早卒汪少孤貧六歲過江依外家新野庾氏荊州刺史王澄見而奇之曰興范族者必是子也年十三喪母居喪盡禮親鄰哀

之及長好學外氏家貧無以資給汪乃廬於園中布衣
蔬食然薪寫書書畢誦讀亦遍遂博學多通善談名理
弱冠至京師屬蘇峻作難王師敗績汪乃遁逃西歸庾
亮溫嶠屯兵尋陽未敢輕進及汪至嶠等訪之汪曰賊
政令不一貪暴縱橫滅亡已兆雖彊易弱朝廷有倒懸
之急宜時進討嶠深納之是日護軍平南二府禮命交
至始解褐參護軍事賊平賜爵都鄉侯復爲庾亮平西
參軍從討郭默進爵亭侯辟司空郗鑒掾除宛陵令復
參亮征西軍事轉州別駕汪爲亮佐吏十有餘年甚相
欽待轉鷹揚將軍安遠護軍武陵內史徵拜中書侍郎

時庾翼將悉郢漢之眾以事中原軍次安陸尋轉屯襄
陽汪上疏謂宜嚴詔諭翼還鎮養銳以爲後圖尋以汪
爲安西長史溫西征蜀委以留府蜀平進爵武興縣侯
自請爲東陽太守在郡大興學校甚有惠政頃之召入
頻遷中領軍本州大中正時簡文帝作相甚相親昵除
都督徐兗青冀四州揚州之晉陵諸軍事安北將軍徐
兗二州刺史假節旣而桓溫北伐令汪率文武出梁國
以失期免爲庶人朝廷憚溫不敢執談者爲之歎恨汪
屏居吳郡從容講肄不言枉直後至姑孰見溫謂汪遠
來詣已傾身引望汪旣至纔坐溫謝其遠來意汪實來

造温恐以趨時致損乃曰亡兒瘞此故來視之温殊失望而止時年六十五卒於家贈散騎常侍諡曰穆

晉書列傳

范甯汪子字武子少篤學多所通覽簡文帝爲相將辟之爲桓温所諷遂寢不行時以浮虛相扇儒雅日替甯以爲其源始於王弼何晏二人之罪深於桀紂乃著爲論崇儒抑俗率皆如此温薨之後始解褐爲餘杭令在縣興學校養生徒葺年之後風化大行在職六年遷臨淮太守封陽遂鄉侯頃之徵拜中書侍郎在職多所獻替有益政道時更營新廟博求辟雍明堂之制甯據經傳奏上皆有典證孝武帝雅好文學甚被親愛甯指斥

朝士直言無諱尋求補豫章太守帝曰豫章不宜太守何急以身試死邪甯不信卜占固請行臨發上疏並陳時政帝善之初甯之出非帝本意故所啟多合旨甯在郡又大設庠序資給眾費一出私錄並取郡四姓子弟皆充學生課讀五經又起學臺功用彌廣江州刺史王凝之議其專擅詔罪之會赦免甯既免官家於丹陽猶勤經學終年不輟年六十三卒於家初甯以春秋穀梁氏未有善釋遂沈思積年爲之集解其義精審爲世所重既而徐邈復爲之注世亦稱之子泰元熙中爲護軍

將軍

晉書列傳

北魏

宋隱字處默西河介休人父恭尚書徐州刺史慕容儁徙鄴恭始家於廣平列人焉性至孝年十三便有成人之志專精好學不以兵難易操仕慕容垂歷尚書郎太子中舍人本州別駕太祖平中山拜隱尚書吏部郎車駕還北詔隱以本官輔衛王儀鎮中山尋轉行臺右丞領選如故屢以老病乞骸骨不許尋以母喪歸列人既葬被徵固辭以病而州郡切以期會隱乃棄妻子間行避焉後匿於長樂之經縣數年而卒臨終謂其子姪等曰苟能入順父兄出悌鄉黨仕郡幸而至功曹史以忠

清奉之則足矣不勞遠詣臺閣恐汝不能富貴而徒延門戶之累耳若忘吾言是爲無若父也使鬼而有知吾不歸食矣有五子第三子溫世祖時徵拜中書博士卒追贈建威將軍豫州刺史溫弟演顯祖初從征彭城有功拜明威將軍濟北太守隱弟輔字處仁少慷慨有大操博覽羣書州辟別駕早卒

魏書列傳

宋洽隱之叔父也爲慕容垂尙書太祖之圍中山也洽率所領專守北圍當洽所統官軍多被傷殺太祖特深忿恨及城平遂殺之子順訓並下腐刑洽第四子宣字道茂時年數歲親人竊逃以免後與范陽盧元渤海高

允及從子愔俱被徵拜中書博士尋兼散騎常侍使劉義隆加冠軍將軍賜爵中都侯領中書侍郎行司隸校尉真君七年卒贈司隸諡簡侯子謨字乾仁襲爵卒於遼西太守子鸞字珍和襲爵東莞太守鸞弟瓊字普賢少以孝行稱母曾病季秋之月思瓜不已瓊夢想見之求而遂獲時人稱異母終州郡屢辟皆不就卒於家

魏書

列傳

宋弁字義和廣平列人人祖愔與從叔宣博陵崔建俱知名世祖時歷位中書博士員外散騎常侍使江南賜爵列人子還拜廣平太守興安五年卒贈安遠將軍相

州刺史諡曰惠長子顯襲爵弁伯父世顯無子養弁爲後弁父叔珍李敷妹夫因敷事而死弁才學備瞻少有美名高祖初至京師見尙書李冲因言論移日冲竦然異之退而言曰此人一日千里王佐才也顯卒弁襲爵弁與李彪州里迭相祇好彪爲秘書丞弁自中散彪請爲著作佐郎尋除尙書殿中郎中高祖歷訪治道弁年少官微自下而對聲姿清亮進止可觀高祖稱善者久之因是大被知遇賜名爲弁意取弁和獻玉楚王不知寶之也遷中書侍郎兼員外常侍使於蕭蹟蹟司徒蕭子良秘書丞王融等皆稱美之轉散騎侍郎時散騎位

在中書之右高祖曾論江左事因問其政道興亡之數
弁對曰蕭氏父子無大功於天下既以逆取不能順守
必不能貽厥孫謀保有南海若物憚其威身免爲幸後
車駕南征以弁爲司徒司馬曜武將軍三軍振懼莫敢
犯法黃門郎崔光薦弁自代高祖不許然亦賞光知人
未幾以弁兼黃門尋卽正兼司徒左長史時大選內外
羣官并定四海士族弁專參銓量之任事多稱旨然好
言人之陰短頗爲時人所怨從駕南討詔弁於豫州都
督所部及東荆領葉皆滅戍士營農水陸兼作遷散騎
常侍尋遷右衛將軍領黃門弁屢自陳讓高祖不許其

被知遇如此始高祖北都之選也李冲頗抑宋氏弁有
恨於冲而與李彪交結雅相知重及冲劾彪不至大罪
弁之力也彪除名爲民弁大相嗟慨密圖申復高祖在
汝南不豫大漸旬有餘日不見侍臣弁獨進及御牀獻
歛流涕曰臣不謂陛下聖顏毀瘠乃爾由是益重之車
駕征馬圈留弁以本官兼祠部尙書攝七兵事弁頓首
辭謝弁劬勞王事夙夜在公恩遇之甚輩流莫及高祖
每稱弁可爲吏部尙書及崩遺詔以弁爲之與咸陽王
禧等六人輔政而弁已先卒年四十八詔賜錢十萬布
三百疋贈安東將軍瀛州刺史諡曰貞順

魏書
列傳

宋翻字飛鳥廣平列人吏部尚書弁族弟少有操尚
世人以剛斷許之世宗初起家奉朝請本州治中廣平
王郎中合尋拜河陰令翻弟道瓊先爲冀州京兆王愉
法曹行參軍愉反逼道瓊爲官翻與弟世景俱囚廷尉
道瓊後棄愉歸罪京師猶坐身死翻世景除名久之拜
翻治書侍御史洛陽合中散大夫相州大中正猶領治
書又遷左將軍南兗州刺史時蕭衍遣將據荆山屬壽
春淪陷賊遂乘勢徑趨項城翻遣將成僧達潛軍討襲
破之自是州境怙然孝莊時除司徒左長史撫軍將軍
河南尹初翻爲河陰合順陽公主家奴爲劫攝而不送

翻將兵圍主宅執主壻馮穆縣舊有大柳時人號曰彌
尾青及翻爲縣主吏請焚之翻曰且置南牆下以待豪
家未幾有內監楊小駒詣縣請事辭色不遜命取尾青
以鎮之旣免入訴於世宗世宗大怒敕河南尹推治其
罪翻具自陳於是威振京師及爲洛陽迄於爲尹畏憚
權勢更相承接故當世之名大致減損永安三年卒於
位贈侍中衛將軍相州刺史出帝初重贈驃騎大將軍
儀同三司尚書左僕射雍州刺史諡曰貞烈子思遠卒
於司空從事中郎翻弟毓字道和敦篤有志行爲平西
將軍大中大夫

魏書
列傳

房亮字景高清河人父法延譙郡太守亮好學有節操
 太和中舉秀才為奉朝請拜秘書郎又兼員外散騎侍
 郎副中書侍郎宋弁使於蕭蹟還除尚書二千石郎中
 濟州中正兼員外常侍使高麗高麗王託疾不拜以亮
 辱命坐白衣守郎中後除濟北太守轉平原太守以清
 嚴稱時冀州刺史京兆王愉據州反平原界在河北與
 愉接境愉乃遣人說亮啖以榮利亮即斬其使人發兵
 防捍愉怒遣其大將張靈和率眾攻亮亮督厲兵民喻
 以逆順出城拒擊大破之尋遭憂解任服終除左將軍
 汲郡太守遷前將軍東荊州刺史亮留心撫納夷夏安

之時邊州刺史例得一子出身亮不言其子而啟弟子
 超為奉朝請議者稱之轉平東將軍滄州刺史入為光
 祿大夫加安東將軍永安二年卒年七十一贈撫軍將
 軍齊州刺史子柬字元約卒於光祿大夫亮弟詮字鳳
 舉為尚書郎本州中正卒贈撫軍將軍齊州刺史魏書
列傳
 房悅字季欣亮之弟解褐廣平王懷國常侍轉青州平
 東府中兵參軍加宣威將軍遷高陽太守轉廣川太守
 加鎮遠將軍普泰中濟州刺史張瓊表所部置南清河
 郡仍請悅為太守朝廷從之凡歷三郡民吏安之遷平
 東將軍大中大夫興和二年卒年七十贈征東將軍濟

州刺史長子超字伯穎武定末司徒錄事參軍濟州大

中正

魏書房亮傳

潘永基字紹業長樂廣宗人父靈虬中書侍郎永基性通率輕財好施爲冀州鎮東府法曹行參軍遷威烈將軍揚州曲陽戍主轉西硤石戍主治陳留南梁二郡事頗有威惠轉揚州車騎府主簿累遷虎賁中郎將直寢前將軍出爲持節平北將軍冀州防城都督長樂太守葛榮攻信都永基與刺史元孚同心戮力晝夜防拒力窮乃陷榮欲害孚永基請以身代孚死永安二年除潁川太守遷鎮東將軍東徐州刺史時蕭衍將曹世宗馬

洪武等率衆來寇永基出討破之永熙中爲征東將軍金紫光祿大夫遷車騎將軍左光祿大夫尋加衛大將軍復除東徐州刺史前後在州爲吏民所樂代還京師元象初卒年五十六贈散騎常侍都督冀瀛滄三州諸軍事驃騎大將軍尚書右僕射司徒公冀州刺史

魏書列傳

宋世良字元友廣平列人人年十五便有膽氣應募從軍後隨伯父翻在南兗州屢有戰功魏臨淮王彧與語奇之帝將討余朱榮密令彧將兵赴洛彧在梁郡稱疾假世良都督令還南兗發兵世良請簡見兵三千騎五日必到洛陽并陳三策彧皆不從尋爲殿中侍御史詣

河北括戶大獲浮惰還見汲郡城旁多骸骨移書州郡
悉令收瘞其夜甘雨滂沱河內太守田估贓貨百萬世
良檢按之未竟遇赦而還孝莊帝勞之曰知卿所括得
丁倍於本帳若官人皆如此用心便是更出一天下也
其後遷殿中世良以殿中主齋會事請改付餘曹帝曰
卿意不欲親庖廚耶宜付右兵以爲永式後拜清河太
守才識閑明尤善政術在郡未幾聲望甚高陽平郡移
掩劫盜三十餘人世良訊畢唯送十二人餘皆放之陽
平太守魏明明大怒言何故縱賊及推問送者皆實放
者皆非明明大服郡東南有曲隄豪族成公居之羣盜

多萃焉人爲之語曰甯度東吳會稽不厯成公曲隄世
良爲施八條之制盜奔他境人又謠曰曲隄雖險賊何
益但有宋公自屏迹齊天保初大赦郡無一囚率羣吏
拜詔而已獄內穉生桃樹蓬蒿亦滿每日牙門虛寂無
復訴訟者謂之神門其冬醴泉出於界內及代至傾城
祖道有老人丁金剛者泣而前曰老人年九十記三十
五政府君非唯善政清亦澈底今失賢者人何以濟衆
皆攀轅涕泣後卒於東郡太守贈信州刺史子伯宗官
侍御史性清退好學多所撰述至齊亡不徙職遂不入
仕大業初卒於家

北齊書
參北史

宋世景廣平人河南尹繇之第三弟也少自修立事親以孝聞與弟道璵下帷誦讀博覽羣言尤精經義族兄弁甚重之舉秀才對策上第拜國子助教遷彭城王勰開府法曹行參軍勰愛其才學雅相器敬高祖亦嘉之遷司徒法曹行參軍世景明刑理著律令裁決疑獄剖判如流轉尚書祠部郎彭城王勰每稱之曰宋世景精識尚書僕射才也臺中疑事右僕射高肇常以委之世景既才長從政加之夙勤不怠兼領數曹深著稱績頻爲左僕射源懷引爲行臺郎巡察州鎮十有餘所黜陟賞罰莫不咸允遷徙十鎮別置諸戍明設亭侯以備北

虜懷大相委重還而薦之於世宗曰宋世景文武才略當今寡儔清平忠直亦少其比陛下若任之以機要終不減李冲也世宗曰朕亦聞之尚書令廣陽王嘉右僕射高肇吏部尚書中山王英共薦世景爲國子博士尋薦爲尚書右丞尋加伏波將軍行滎陽太守鄭氏豪橫號爲難治世景繩之以法於是寮屬畏威莫敢不肅終日坐於廳事未嘗寢息縣史三正及諸細民至卽見之無早晚之節來者無不盡其情抱皆假之恩顏屏人密語民間之事巨細必知發姦摘伏有若神明於是上下震悚莫敢犯禁坐弟道璵事除名世景友于之性過絕

於人及道璵死哭之哀切形容毀悴見者莫不歎愍歲餘母喪遂不勝哀而卒世景嘗撰晉書竟未得就子季儒遺腹生弱冠太守崔楷辟為功曹起家太學博士明威將軍會至譙宋之間為文弔嵇康甚有理致後夜寢室壞壓殞年二十五時人咸傷惜之世景弟叔集亦有學行征東將軍裴衍之討葛榮也表為員外散騎侍郎引同戎役及衍敗同時遇害

魏書列傳

宋道璵世景弟少而敏儁世宗初以才學被召與祕書丞孫惠蔚典校羣書考正同異自太學博士轉京兆王愉法曹行參軍臨死作詩及挽歌詞寄之親朋以見怨

痛道璵又曾贈著作佐郎張始均詩其末章云子深懷璧憂余有當門病道璵既不免難始均亦遇世禍時咸

怪之同上

劉藻字彥先廣平易陽人六世祖遐從司馬叡南渡父宗之為劉裕廬江太守藻涉獵羣籍美談笑善與人交飲酒至一石不亂永安中與姊夫李疑俱來歸國賜爵易陽子擢拜南部主書號為稱職時北地諸羌數萬家恃險作亂朝廷患之以藻為北地太守藻推誠布信諸羌咸來歸附朝廷嘉之遷龍驤將軍雍城鎮將先是氏豪徐成楊黑等驅逐鎮將藻至鎮擒獲成黑等斬之以

徇羣氏震懼雍州人王叔保等三百人表乞藻爲駭奴
戍主詔曰選曹已用人藻有惠政自宜他敘在任八年
遷離城鎮將太和中改鎮爲岐州以藻爲岐州刺史轉
秦州刺史秦人恃險率多麤暴藻開示恩信誅戮豪橫
羌氏憚之遇車駕南伐以藻爲東道都督秦人紛擾詔
藻還州人情乃定仍與安南將軍元英征漢中頻破賊
軍長驅至南鄭垂平梁州奉詔還軍乃不果克後車駕
南伐以藻爲征虜將軍督統軍高聰等四軍爲東道別
將後與高聰等戰敗俱徙平州景明初世宗追錄舊功
以藻爲太尉司馬是年六月卒年六十七贈錢六萬

魏書

列傳

傅永字修期清河人幼隨叔父洪仲自青州入國尋復
南奔有氣幹拳勇過人能手執鞍橋倒立馳騁年二十
餘有友人與之書而不能答請於洪仲洪仲深讓之而
不爲報永乃發憤讀書涉獵經史兼有才筆自東陽禁
防爲崔道固城局參軍與道固俱降入爲平齊民父母
並老飢寒十數年賴其彊於人事戮力傭丐得以存立
晚乃被召兼治禮郎詣長安拜文明太后父燕宣王廟
令賜爵貝邱男加伏波將軍未幾除中書博士又改爲
議郎轉尙書考功郎中爲大司馬從事中郎尋轉都督

任城王澄長史兼尙書左丞王肅之爲豫州以承爲建武將軍平南長史肅以承宿士禮之甚厚承亦以肅爲高祖眷遇盡心事之蕭鸞遣將侵豫州之太倉口肅令承勒甲士三千擊之時康祚等軍於淮南承舍淮北承旣設伏其夜康祚公政等果親率領來斫承營東西二伏夾擊之康祚等奔趨淮水既競起不能記其本濟遂望承所置之火而爭渡焉水深溺死斬首者數千級生擒公政斬康祚首送京師時裴叔業率王茂先李定等來侵楚王戍承適還州伏兵於左道擊其後軍破之並獲叔業傘扇鼓幕甲仗萬餘兩月之中遂獻再捷高

祖嘉之遣謁者就豫州策拜永安遠將軍鎮南府長史汝南太守貝邱縣開國男食邑二百戶高祖每歎曰上馬能擊賊下馬作露布唯傅修期耳裴叔業又圍渦陽時高祖在豫州遣承爲統軍與高聰劉藻等往救之承曰先深溝固壘然後圖之聰等不從一戰而敗聰藻徙爲邊民承免官爵而已不經旬又詔爲揚武將軍汝陰鎮將帶汝陰太守景明初蕭寶卷將陳伯之侵逼壽春詔遣承爲統軍領汝陰之兵三千人先援之承總勒士卒水陸俱下達壽春遂孤軍城外與勰并勢以擊伯之頗有剋捷中山王英之征義陽承爲甯朔將軍統軍當

長圍遏其南門自將馬步千人南逆仙琕環甲揮戈突
陳橫過賊射永洞其左股永拔箭復入遂大破之義陽
既平還京復封賜帛二千疋除大中大夫行秦梁二州
事代邢巒鎮漢中後還京師於路除恒農太守然於治
民非其所長故在任無多聲稱未幾解郡還為大中大
夫行南青州事遷左將軍南兖州刺史還京拜平東將
軍光祿大夫熙平元年卒年八十三贈安東將軍齊州
刺史魏書列傳
監伯陽清河人善論語毛詩春秋周易頓邱名儒董徵
從受業焉北史董徵傳

重修廣平府志卷四十七

列傳二 北齊至五代

北齊

陳元康字長猷廣宗人父終德魏濟陰內史元康貴贈
度支尚書諡曰貞元康頗涉文史有幹才魏正光中從
李崇北伐以功賜爵臨清男普泰中除主書累遷司徒
高昂記室齊神武召授大丞相功曹內掌機密善陳事
意不務華藻遷大行臺都官郎封安平子軍國多務元
康問無不知神武臨行留元康在後有號令九十餘條
元康盡能記憶神武甚親之神武之伐劉蠡升天寒雪

深使元康於氍毹下作軍書颯颯運筆筆不及凍俄頃數紙及出神武目之曰此何如孔子耶神武嘗怒歐文襄告元康元康俯泣曰王教世子過矣神武自是爲之懲忿謂左右曰元康用心誠實必與我兒相抱文襄入輔居鄴下崔暹張亮等並爲神武待遇然皆出元康下時人語曰三崔二張不如一康從神武次於芒山將戰失陣圖元康冒險求得之西師旣敗神武會諸將議進取策元康言時不可失必追之神武不從累遷大行臺左丞及神武疾篤謂文襄曰芒山之戰恨不用元康言死不瞑目事皆當與元康定也神武薨祕不發喪唯元康

知之文襄嗣事自晉陽將之鄴令元康預作神武條教數十紙別封昌國縣公以從侯景反文襄欲殺崔暹以謝景元康力諫乃止高岳討侯景未克文襄欲遣潘相樂副之元康以慕容紹宗薦文襄乃任紹宗遂破景賞元康金五十斤王思政入潁城諸將攻之不能拔元康進曰公自匡朝政未有殊功今潁城將陷願公因而乘之文襄乃親征潁川遂克之賞元康金百錠初魏朝授文襄相國齊王諸將皆勸受之獨元康以爲未可文襄內漸嫌之欲用爲中書令處以閑地事未施行屬將受魏禪北史本傳乃屏左右而與元康及崔季舒密謀於城北

東柏堂

北史齊本紀

文襄之掌廚蒼頭蘭固成因進食置刀

盤下殺文襄元康與賊爭刀髻解被刺腸出猶手書辭

母至夜而終時年四十三

北史本傳

明年乃贈使持節都督

冀定瀛殷滄五州諸軍事驃騎大將軍司空公冀州刺

史諡曰文穆賻物一千二百段元康母李氏以哀死贈

廣宗郡君諡曰貞昭子善藏武平末假儀同三司給事

黃門侍郎隋開皇中為尚書郎大業初卒於彭城郡贊

治元康弟諶官至大鴻臚次季瓌鉅鹿太守轉美州別

駕平秦王歸彥反遇害贈衛尉卿趙州刺史

北齊書列傳

趙起字興洛廣平人父達幽州錄事參軍起性沈謹有

幹用齊高祖起兵時以起為定州刺史段榮典籤除奉

車都尉天平中高祖為魏相徵為相府騎兵二局典兵

馬十餘載累加中散大夫世宗嗣事出為建州刺史遷

侍中及顯祖即位起罷州還闕累遷大鴻臚卿起雖歷

九卿侍中常兼典兵馬監調發居腹心寄後出為西兗

州刺史被劾禁錮歲餘以無驗獲免河清二年徵還晉

陽加祠部尚書開府天統初轉太常卿食瑯琊郡幹二

年除滄州刺史加六州都督武平中卒於官贈都督滄

州刺史

齊書參北史

宋世軌列人人世良弟幼修整好法律天保初歷三尚

書三公二千石都官郎中兼并州長史執獄寬平多所全濟爲都官郎中有囚被枉將垂執法世軌遣騎止之而奏其狀遂免稍遷廷尉少卿洛州有羣盜欲劫河橋吏捕獲之事連諸元徒黨凡千七百人廷尉崔昂欲以反斷歷數年不決及世軌爲少卿乃判爲劫誅盜魁而悉捨其徒時大理正蘇珍之亦以平反名寺中語曰決定嫌疑蘇珍之視表見裏宋世軌時人以爲寺中二絕南臺囚到廷尉世軌多雪之仍移攝御史將問其濫狀中尉畢義雲不送移往復不止世軌遂上書極言義雲酷擅文宣引見二人親敕世軌曰我知臺欺寺久卿能

執理抗衡甚善但守此心勿慮不富貴敕義雲曰卿比所爲誠合死以志在疾惡故且恕卿及卒廷尉御史諸繫囚皆哭曰宋廷尉死我等豈有生路贈光州刺史諡

曰平無子世良以第五子朝基嗣

北史

慕容儼字恃德清都成安人慕容廆之後也父叱頭魏南頓太守儼容貌出羣衣冠甚偉不好讀書頗學兵法工騎射正光中魏河間王元琛率衆救壽春辟儼左廂軍主以戰功賞帛五十疋軍次西碛石因解渦陽之圍梁遣將鄭僧等要戰儼擊之斬其將蕭喬梁人奔遁又襲破王神念等軍三年梁遣將攻東豫州儼督別將鄭

海珍與戰斬其軍主朱僧珍軍副秦太又擊賊王苟於陽夏平之孝昌中朱榮入洛授儼京畿南面都督永安中西荆州爲梁將曹義宗所圍儼應募赴之時北育太守宋帶劍謀叛儼出其不意執之一郡遂定又破梁將馬元達蔡天起柳白嘉等累有功除強弩將軍與梁將王元真董當門等戰並破之解穰城圍剋復南陽新鄉轉積射將軍持節豫州防城大都督朱敗與豫州刺史李恩歸高祖以勲累遷安東將軍高梁太守東雍州刺史沙苑之敗西魏荆州刺史郭鸞率衆攻儼拒守二百餘日晝夜力戰大破鸞軍擒西魏刺史郭他時諸

州多有翻陷唯儼獲全進號鎮南將軍武定三年率師解襄州圍又從攻玉壁賜帛七百疋五年鎮河橋五城侯景叛儼擊陳郡賊擒斬百餘級旋軍項城又擒景部下二千人六年除譙州刺史屢有戰功七年除膠州刺史天保初除開府儀同三司三年梁司徒陸法和儀同宋蒞等率其部下以郢州城內附時清河王岳帥師江上遣儼鎮郢城始入便爲梁大都督侯瑱任約率水陸軍奄至城下儼隨方禦備瑱等不能剋又於上流塞船路人信阻絕城守孤懸衆情危懼儼導以忠義乃順士卒之心相率祈請城隍神冀獲冥祐須臾衝風欻起漂

斷荻蒺如此者再三城人大喜以為神助瑱移軍於城北造柵置營儼乃率步騎出城奮擊大破之更繕城雉造船艦水陸備具工無暫闕蕭循又率眾五萬與瑱約合軍攻擊儼與將士力戰終夕約等乃退追斬瑱驍將張白石夏五月瑱約等又相與并力悉眾攻圍城中食少糧運阻絕無以為計儼猶申合將士信賞必罰分甘同苦死生以之自正月至六月人無異志後蕭方智立遣使請和顯祖以城在江表據守非便有詔還之儼望帝悲不自勝帝呼合至前執其手曰觀卿容貌朕不復相識自古忠烈豈能過此儼對曰臣恃陛下威靈得申

愚節不屈豎子重奉聖顏今雖夕死沒而無恨帝嗟稱不已除趙州刺史進伯為公九年又討賊有功賜帛一百疋錢十萬十年詔除揚州行臺與王貴顯侯子監將兵衛送蕭莊築郭默若耶二城與陳新蔡太守魯悉達戰大蛇洞破走之卒贈司徒尚書合北齊書列傳宋遊道廣平人其先自燉煌徙焉父季預為渤海太守遊道弱冠隨父在郡父亡吏民贈遺一無所受事母以孝聞其叔父某為奴誣以逆遊道誘令返雪而殺之魏廣陽王深北伐請為鎧曹後為定州刺史又以為府佐及王為葛榮所殺元徽乃誣其降賊收錄妻子賴遊道

爲訴得釋中尉酈善長嘉之引爲殿中侍御史有見賊能討宋遊道之謠孝莊卽位除左中兵郎中以與尙書令臨淮王彧忤乞解官尋除司州中從事再遷至尙書左丞累劾太師咸陽王坦太保孫騰司徒高隆之司空侯景等百寮憚之然竟以事爲隆之及左僕射襄城王旭尙書鄭述祖等所譖除名從齊文襄至晉陽爲大行臺吏部數遷至司徒左長史黃門郎溫子昇之死也棄屍路隅遊道收而葬之文襄謂曰卿真是重節義人尋除御史中尉天保元年兼太府卿於少府覆檢主司所乾沒得鉅萬而奸吏反誣奏之遂下獄事白復官卒遺

令薄葬不立碑表不求贈諡贈瓜州刺史武平中以子士素久典機密重贈儀同三司諡曰貞惠兗州人爲立生祠題曰忠清君子三士素士約士遜士素沈默寡言有才識累遷至儀同三司散騎常侍除黃門侍郎共參機密幾二十年士約官尙書左丞人亦目爲善士

北齊書列傳

宋欽道廣平人魏吏部尙書弁孫也初爲大將軍主簿典書記後爲黃門侍郎又合在東宮教太子習事時鄭子默以文學見知亦被親寵欽道本文法吏不甚諳識古今凡有疑事必詢於子默二人幸於兩宮雖諸王貴

臣莫不敬憚欽道又遷秘書監與楊愔同誅贈吏部尚

書趙州刺史

北齊書
楊愔傳

荀士遜廣平人好學有思理為文清典見賞知音武定
末舉司州秀才迄天保十年不調皇建中馬敬德薦為
主書世祖時轉中書舍人狀貌甚醜以文辭見用曾有
事須奏值世祖在後庭因左右轉通者不得士遜姓名
乃云醜舍人世祖曰必士遜也看封題果是內人莫不
忻笑後主即位累遷中書侍郎號為稱職與李若等撰
典言行於世齊滅年卒

北齊書
文苑傳

李漢子廣平郡孝廉天保七年詔校定羣書供皇太子

覽與冀州秀才高乾和等十一人同被尚書詔共刊定

北史樊
遜傳

房豹字仲幹清河人祖法壽父翼宗豹體貌魁岸美音
儀釋褐開府參軍兼行臺郎中隨慕容紹宗紹宗自云
有水厄遂於戰艦中浴并自投於水冀以厭當之豹曰
夫命也在天豈人理所能延促公若實有災肯恐非禳
所能解若其實無何禳之有紹宗笑曰不能免俗聊復
爾未幾紹宗遇溺時論以為知微遷樂陵太守鎮以凝
重哀矜貧弱階庭簡靜囹圄空虛郡治瀕海水味多鹹
苦豹命鑿一井遂得甘泉遐邇以為政化所致豹罷歸

重刊廣平府志 卷四十一
後井味復鹹齊滅還鄉園自養頗微辭疾終於家北齊書列傳

隋

馬光字榮伯武安郡人少好學從師數十年晝夜不息圖書識緯莫不畢覽尤明三禮為儒者所宗開皇初徵授太學博士嘗因釋奠高祖親幸國子學王公以下畢集光升座講禮啟發章門已而諸儒生以次論難者十餘人皆當時碩學光剖析疑滯雖辭非俊辨而理義宏贍論者莫測其淺深咸共推服上嘉勞焉山東三禮學者自熊安生後惟宗光一人初教授瀛博間門徒千數

至是多負笈從入長安後丁母憂歸里遂有終焉之志

以疾卒於家年七十三隋書儒林傳

郭懋廣平人明習左傳信都劉焯河間劉炫同從受學

隋書劉焯傳

房山基清河人開皇中為考功以明幹稱隋書

唐

王君愕洛州邯鄲人有沈謀隋亂并州人王君廓掠邯鄲君愕往說曰隋氏失御豪俊共救其亂宜撫納遺賸而保全之觀時變待真主足下無尺寸之地兼旬之糧劫眾而興但恣殘剽所過失望竊為足下羞之君廓謝

日計安出答曰井陘之險可先取君廓從其言遂屯井陘山高祖入關與君廓偕來拜君愕大將軍封新興縣公累遷左武衛將軍從太宗征遼領左屯營兵與高麗戰駐驛山死於陣贈左衛大將軍幽州都督邢國公陪

葬昭陵

新唐書
列傳

王及善君愕子以父死事授朝散大夫襲邢國公爵皇太子宏立擢及善左奉裕率太子宴於宮命宮臣擲倒及善辭曰殿下自有優人臣苟奉令非羽翼之美太子謝之高祖聞賜絹百匹除右千牛衛將軍帝曰以爾忠謹故擢三品要職病免召爲衛尉卿垂拱中歷司屬卿

山東饑詔爲巡撫賑給使拜春官尙書出爲秦州都督益州長史加光祿大夫以老病致仕神功元年契丹擾山東擢魏州刺史武后勞曰逆虜盜邊公雖病可與妻子行日三十里爲朕卧治爲屏蔽也因延問朝政得失及善陳治亂所以后悅曰禦寇末也輔政本也公不可行留拜內史來俊臣繫獄當死后欲釋不誅及善曰俊臣凶狡不道引亡命汙戮善良天下疾之不剿絕元惡且搖亂貽禍憂未旣也后納之廬陵王之還密贊其謀旣爲皇太子又請出外朝以安羣臣及善不甚文而清正自將臨事不可奪有大臣節時二張怙寵每侍宴無

人臣禮及善數裁抑之后不悅曰卿年高不宜侍游宴但檢校閣中及善卽移病餘月后不復問歎曰中書令可一日不見天子乎遂乞骸骨猶不許改文昌左相同鳳閣鸞臺三品卒年八十二贈益州大都督諡曰貞陪葬乾陵同

程名振洛州平恩人大業末仕竇建德爲普樂令甚有能名諸賊不敢犯其境尋棄建德歸國高祖遙授永年

新唐書作授永甯令

合仍合率兵經略河北名振夜襲鄴縣俘其男女千餘人以歸去鄴八十里閱婦人有乳汁者九十餘人悉放遣之鄴人感其仁恕爲之設齋以報其恩及

建德敗始之任俄而劉黑闥陷洛州名振復與刺史陳君賓自拔歸朝母潘妻李在路爲賊所掠名振又從太宗討黑闥時黑闥於冀貝滄瀛等州水陸運糧以拒官軍名振率千餘人邀擊之盡毀其舟車黑闥聞之大怒遂殺名振母妻及黑闥平名振請手斬黑闥以其首祭母以功拜營州都督府長史封東郡公賜物二千段黃金三百兩累轉洛州刺史太宗將征遼東召名振問以經略之事名振初對失旨太宗動色詰之名振酬對逾辯太宗意解卽日拜右驍衛將軍授平壤道行軍總管前後攻沙卑城破獨山陣皆以少擊衆稱爲名將永徽

六年累除榮州都督兼東夷都護又率兵破高麗於貴端水焚其新城殺獲甚衆後歷晉浦二州刺史龍朔二年卒贈右衛大將軍諡曰烈

舊唐書程務挺傳

程務挺名振子少隨父征討以勇力聞遷右領軍衛中郎將永隆中突厥史伏念反叛詔禮部尙書裴行儉率兵討之務挺爲副將仍檢校豐州都督時伏念屯於金牙山務挺與副總管唐元表引兵先逼之伏念懼不能支遂降務挺以功遷右衛將軍封平原郡公永淳二年綏州城平縣人白鐵余率部落稽之黨據縣城反詔務挺與夏州都督王方翼討之務挺進攻其城拔之生擒

白鐵余盡平其餘黨又以功拜左驍衛大將軍檢校左羽林軍副聖初與右領軍大將軍檢校左羽林軍張虔勗同受則天密旨帥兵入殿庭廢中宗爲廬陵王立豫王爲皇帝則天臨朝累受賞賜特拜其子齊之爲尙乘奉御務挺泣請迴授其弟則天嘉之下制褒美乃拜其弟原州司馬務忠爲太子洗馬又明年以務挺爲左武衛大將軍單于道安撫大使督軍以禦突厥務挺善於緩禦威信大行偏裨以下無不盡力突厥甚憚之相率遁走不敢近邊及裴炎下獄務挺密表申理之由是忤旨務挺素與唐之奇杜求仁友善或構言務挺與裴炎

徐敬業皆潛相應接則天遣左鷹揚將軍裴紹就軍斬之籍沒其家突厥聞務挺死所在宴樂相慶仍為務挺立祠每出師攻戰即祈禱焉

舊唐書列傳

毛藻字行斌雞澤人曾祖買祖甯父卿皆仕齊隋間藻

性疏放不拘名檢隋末歸唐授上儀同尋陞熊州司倉

參軍冀氏縣令克王世充滅竇建德屢有功授朝散大

夫降驍騎尉致政歸咸亨四年卒年七十二

唐墓志

韓固文字南金雞澤人曾祖起祖韶仕齊隋間父士行

唐明經儒林郎固文釋褐芮城尉考滿調鹽山遷望都

主簿清慎自矢所在以治稱儀鳳二年卒年五十五

唐墓志

志

蓋文懿貝州宗城人

舊唐書

以儒學稱與宗人文達時號

二蓋高祖於祕書省置學以教王公子文懿為國子助

教既升席公卿更相質問文懿譬曉密微遠近宗仰終

國子博士

新唐書儒學傳

潘師正貝州宗城人少喪母廬墓以孝聞隱居逍遙谷

高宗幸東都召見問所須對曰茂松清泉臣所須也既

不乏矣帝異之詔即其廬作崇唐觀及營奉天宮又敕

直逍遙谷作門曰仙遊北曰尋真時太常獻新樂帝更

名祈仙望仙翹仙曲卒年九十八贈大中大夫謚體元

先生新唐書
隱逸傳

賈公彥洛州永年人永徽中官至太學博士撰周禮義疏五十卷儀禮義疏四十卷時有趙州李元植又受三禮於公彥撰三禮音義行於代舊唐書終太學博士撰次章句甚多新唐書
儒學傳

賈大隱公彥子儀鳳中為太常博士會太常仲春告瑞太廟高宗問禮官何世而然大隱對曰古者祭以首時薦以仲月近世元日奏瑞則二月告廟告者必有薦本於始不得其時焉累遷中書舍人垂拱中博士周棕請武氏廟為七室唐廟為五下比諸侯大隱奏言秦漢母

后稱制未有戾古越禮者悖損國廟數悖大義不可以訓武后不獲已偽聽之時皆服大隱沈正不詭從有大臣體終禮部侍郎同上

李傑本名務光相州滏陽人後魏并州刺史寶之裔孫少以孝友著擢明經第解褐齊州參軍事累遷天官員外郎為吏詳敏有治譽以採訪使行山南時戶口逋蕩細弱下戶為豪力所兼傑為設科條區處檢防亡匿復業者十七八神龍中為河東巡察黜陟使課最為諸道最先天中進陝州刺史水陸發運使置使自傑始改河南尹傑既精聽斷雖行坐食飲省治不少廢繇是府無

淹事人吏愛之寡婦有告其子不孝者傑物色非是謂婦日子法當死無悔乎答日子無狀甯其悔乃命市棺還斂之使人迹婦出與一道士語頃持棺至傑命逋道士按問乃與婦私不得逞傑殺道士內於棺河汴之交舊有梁公埭廢不治南方漕弗通傑調汴鄭丁男復作之不費而利入代宋璟爲御史大夫尙衣奉御長孫昕素惡傑遇於道內恃元宗姬媾與所親楊仙玉共毆辱之傑訴曰敗髮膚痛在身辱衣冠恥在國帝怒詔斬殺昕等於朝堂以謝百官降書慰傑以護作橋陵封武威縣子初傑引侍御史王旭爲護陵判官旭貪贓傑將繩

之未及發反爲所構出衢州刺史遷揚州大都督府長史復爲御史劾免開元六年卒帝悼之特贈戶部尙書

新唐書
列傳

宋慶禮洛州永年人擢明經補衛尉武后詔侍御史桓彥範行河北鄣斷居庸五回等路以備突厥召慶禮與議見其方略器之俄遷大理評事爲嶺南採訪使時崖振五州首領更相掠民苦於兵使者至輒苦瘴癘莫敢往慶禮身到其境諭首領大誼皆釋仇相親州土以安罷戍卒五千厯監察殿中侍御史以習識邊事拜河東河北營田使善騎日能馳數百里性甘勞苦然好興作

濱塞掘穿植兵以邀虜徑議者蚩其不切事稍遷貝州刺史復爲河北支度營田使初營州都督府治柳城扼制奚契丹武后時趙文翽失兩番情攻殘其府更治東漁陽城元宗時奚契丹款附帝欲復治故城宋璟固爭不可獨慶禮執處其利乃詔與太子詹事姜師度左驍衛將軍邵宏等爲使築裁三旬畢俄兼營州都督開屯田八十餘所追拔漁陽淄青沒戶還舊田宅又集商胡立邸肆不數年倉廩充居人蕃輯卒贈工部尚書慶禮爲政嚴少私吏畏威不敢犯太常博士張星以好巧自是諡曰專禮部員外郎張九齡申駁曰慶禮國勞臣在

邊垂三十年往城營州士纔數千無甲兵疆衛指期而往不失所慮遂罷海運收歲儲邊亭宴然其功可推不當醜諡慶禮兄子辭玉亦自詣闕訴改諡曰敬

同上

潘好禮貝州宗城人第明經累遷上蔡令治行最擢監察御史坐小累下除芮城合拜侍御史徙岐王府司馬居後母喪詔奪服固辭不出開元初爲邠王府長史王爲滑州刺史好禮兼府司馬知州事王御下不能肅有詔好禮檢督王家過失皆上聞王每遊觀好禮必諫諭禁切農月王出獵家奴羅冽好禮遮道諫王初不許乃卧馬下諱曰今農在田王何得非時暴禾稼以損下人

要先踐殺司馬然後聽所為王慙為還遷豫州刺史勤力於治清廉無所私然喜察細事下厭其苛子請舉明經好禮曰經不明不可妄進乃自試之不能通怒答之械而徇於門復以功累徙温州別駕卒好禮博學能論議節行修整一意無所傾附未嘗自列階勳居室服用麤苟至終身世謂近名

同上

楊茂謙清河人竇懷貞初為清河令甚重之起家應制舉拜左拾遺出為臨洺令時洺州稱茂謙與清漳令馮元淑肥鄉令韋景駿皆有政理之聲茂謙以清白聞擢為祕書郎時竇懷貞為相數稱薦之由是歷遷大理正

御史中丞開元初出為魏州刺史河北道按察使與司

馬張懷玉本同鄉曲初善而末隙遂相糺訐坐貶桂州

都督尋轉廣州都督以疾卒

舊唐書列傳

張徹清河人長慶中為范陽府監察御史時幽州將父子繼續不廷選且久新牧臣孤怯徹至數日軍亂怨其府從事盡殺之而囚其帥遷徹於別館徹罵眾曰汝何敢反前日吳元濟斬東市昨日李師道斬於軍中同惡者父母妻子皆屠死肉餒狗鼠鴟鴞汝何敢反行且罵眾惡其言共擊殺之徹抵死罵不絕口事聞贈給事中

畿輔通志

傅良弼字安道清河人以射冠軍中初瀛之博野樂壽
介范陽成德間每兵交先薄二城故常為劇屯德宗以
王武俊破朱滔功皆隸成德故以良弼守樂壽李寰守
博野廷湊之叛兩賊交誘之而堅壁為國固守有詔以
樂壽為左神策行營拜良弼為都知兵馬使俄以良弼
為沂州刺史良弼率眾出戰力乃得去天子以良弼忠
有狀乃更賜奴婢服馬召良弼為左神策軍將軍寶曆
初擢夏綏銀節度使異時蕃帳亡命來者必償馬乃與
良弼至皆執付其部酋種歡懷終橫海節度使
新唐書
牛元翼

傳

程休字士美廣平人房垂字翼明清河人與趙人李萼

梁人喬潭同學於元德秀皆號門弟子

新唐書
卓行傳

張眾甫字子初

案唐詩紀
事作干初

清河人

案唐才子傳
作京口人

力學能

文年六十餘始應轉運司辟為太祝

舊志

轉河南壽安縣

尉罷職僑居

全唐詩
小傳

詩以緣情比興疏導心術志之所

之輒詣絕境後拜監察御史為淮甯軍從事建中三年

卒

唐詩
紀事

宋廷芬清河人世以儒聞廷芬能詞章德宗時教習藝

館內賜第一區加穀帛

畿輔
通志

司空曙字文明

一作
文初

廣平人登大厯進士第從韋皋於

劍南

全唐詩小傳

授洛陽主簿未幾遷長林縣丞累官左拾

遺

唐才子傳

貞元中為水部郎中終虞部郎中詩格清華為

大歷中才子之一

全唐詩小傳

與李約員外至交性耿介不

干權要家無餽石宴如也有詩集二卷行世

唐才子傳

張祐字長吉

唐才子傳作承吉唐詩紀事作長吉

清河人

唐才子傳作南陽人

家世

仕顯稱張公子

雍正志

元和中作宮體小詩詞曲豔發時

能其才合諫得譽老大窺建安風格誦樂府錄知作者

本意短章大篇往往間出誦諷怨謫與六義相左右長

慶中令狐楚鎮天平表薦之令以詩三百篇進

唐詩詞紀事

略曰凡制五言苞含六義近多放誕靡有宗師祐久在

江湖早工篇什研幾甚苦搜象頗深輩流所推風格罕

及謹令繕錄詣光順門進獻望宣付中書門下

唐才子傳

元稹所阻失意東歸辟諸侯府性狷介不容物輒自劾

去以曲阿地古澹有南朝遺風遂築室種植家焉性嗜

石笋悉力致之從南海間罷職事載羅浮石笋還不蓄

美田利產為身後計

唐詩紀事

太和中卒

畿輔通志

子望虔

乳名

兒凍餒不自給嘉興監裴洪慶以為冬瓜堰官

唐詩紀事

劉言史邯鄲人與李賀同時歌詩美麗恢贍自賀外世

莫能比初客鎮冀

全唐詩小傳

從王武俊獵發矢斃雙鴨言

史於馬上草射鴨歌議者比之禰衡鸚鵡賦

邯鄲縣志

以武

俊薦授棗強合辭疾不受人因稱為劉棗強客漢南李

夷簡署司空掾尋卒全唐詩小傳

崔元亮字晦叔磁州昭義人貞元初擢進士第累署諸

鎮幕府父喪客高郵卧苦終制地下溼因得痺病不樂

進取元和初召為監察御史累轉駕部員外郎清慎介

特澹如也稍遷密欵二州刺史欵人馬牛生駒犢官籍

蹄噉故吏得為姦元亮焚其籍一不問民山處輸租者

苦之下令許計斛輸錢民賴其利歷湖曹二州辭曹不

拜太和四年繇大常少卿改諫議大夫朝廷推為宿望

拜右散騎常侍每遷官輒讓形於色鄭注構宋申錫捕

逮倉卒內外震駭元亮率諫官叩延英苦諍反復數百

言文宗未諭元亮置笏在陛曰孟某有言左右皆曰殺

之未可也卿大夫皆曰殺之未可也天下皆曰殺之然

後察之乃置於法今殺一凡庶當稽典律况欲誅宰相

乎臣為陛下惜天下法不為申錫言也俯伏流涕帝感

悟繇此名重朝廷頃之移疾歸東都召為魏州刺史卒

年六十六贈禮部尚書元亮晚好黃老清靜術故所居

官未久輒去遺言山東士人利便近皆葬兩都吾族未

嘗遷當歸葬滏陽正首邱之義諸子如命新唐書本傳子芻

言罕言登進士第唐詩紀事孫貽孫位至侍郎舊唐書列傳

宋申錫字慶臣廣平人

案本傳云史失其何所人據宰相世系表增

少孤擢

進士第累辟節度府後頻遷起居舍人以禮部員外郎為翰林學士敬宗時拜侍講學士文宗即位再轉中書舍人復為翰林學士帝惡宦官權寵震主思可與決大事者察申錫忠厚因召對且倚以執政申錫頓首謝未幾拜尚書右丞踰月進同中書門下平章事乃除王璠京兆尹密諭帝詣璠漏言而王守澄黨鄭注得其謀太和五年遣軍侯豆盧著誣告申錫與漳王謀反守澄持奏浴堂將遣騎二百屠申錫家宦官馬存亮爭以為當召南司會議不然京師跂足亂矣守澄乃止捕申錫親

吏張全真家人買子緣信及十六宅典史脅成其罪帝乃罷申錫為太子右庶子召三省官御史中丞大理卿京兆尹會中書集賢院雜驗反狀翌日延英召宰相羣臣悉入初議抵申錫死於是左散騎常侍崔元亮給事中李固言諫議大夫王質等伏殿陛請以獄付外帝震怒元亮固言執據愈切涕泣懇到新唐書帝稍解復召宰相入議牛僧儒曰人臣不過宰相申錫復欲何求且申錫殆不至此注恐覆案詐覺乃勸守澄請止行貶黜續通志由是議貸申錫於嶺表京兆尹崔瑄大理卿王正雅苦請出著與申錫劾正情狀帝悟乃貶申錫開州司馬

從而流死者數十百人天下以爲冤初申錫旣歸其妻
責謂曰公何負天子乃反乎申錫曰吾起孤生位宰相
蒙國厚恩不能鉏奸亂反爲所陷我豈反者乎自爲近
臣凡四方賄謝一不受旣被罪有司驗劾悉得所還問
遺書朝野爲咨閱七年感憤卒有詔歸葬開成元年追
復右丞同中書門下平章事贈兵部尙書錄其子慎微
舊書作慎徽文宗紀又作道微爲城固尉會昌二年賜諡曰貞
劉真字壽伯廣平人會昌中爲磁州刺史後寓居洛陽
築室崧山下每登崧頂回則於峻極院中記其歲月最
後記云今年計共登崧頂者七十四次矣王道輔與其

孫之靜游至院中作詩弔之白香山九老會真得與焉

全唐詩小傳參舊志

張固清河人有詩名懿僖間採摭宣宗遺事詩以紀之

簡當精覈可補史氏之闕

全唐詩集

張蠙字象文清河人乾甯二年進士授校書郎調櫟陽
尉遷犀浦合僞蜀主王建開國拜膳部員外郎後爲金
堂令後主衍奉太后遊大慈寺觀壁上題詩愛賞久之
問誰爲僧以蠙對因賜霞光牋五百幅令以詩進蠙獻
二百首將召知制誥宋光嗣以其輕傲止之僅賜白金
而罷蠙生而穎秀幼能詩咸通時與張喬李昌符號十

哲作登單于臺詩為世所稱十國春秋

馬衡貝州人與邯鄲章徵雞澤馮仁海郭守素皆以事

親居喪著唐書孝友傳敘

五代

王清字去瑕洺州曲周人初仕唐為甯衛指揮使後事

晉為奉國都虞侯安從進叛襄州從高行周攻之逾年

不能下清謂行周曰從進閉孤城以自守其勢豈得久

邪因請先登遂攻破之開運二年冬從杜重威戰陽城

清以力戰功為步軍之最加檢校司徒是冬案本紀及杜重威傳

均作三年重威軍中渡橋南虜軍其北以相拒而虜以精騎

並西山出晉軍後南擊欒城斷晉餉道清謂重威曰晉

軍危矣今去鎮州五里而守死於此營孤食盡將若之

何請以步兵二千為先鋒奪橋開路公率諸軍繼進以

入鎮州可以守也重威許之遣與宋彥筠俱前清與虜

戰敗之奪其橋是時重威已有二志猶豫不肯進彥筠

亦退走清曰吾獨死於此矣案通鑑清謂眾曰上將握

有異吾輩當以死報國因力戰而死年五十三漢高祖

立贈清太傅新五代史子守鈞於本邑義化別業招魂葬之

舊五代史

崔居儉清河人祖蠡父蕤皆為唐名臣居儉美文辭風

骨清秀少舉進士梁貞明中爲中書舍人翰林學士御史中丞唐莊宗時爲刑部侍郎太常卿崔氏自後魏隋唐與盧鄭皆爲甲族吉凶之事各著家禮至其後世子孫專以門望自高爲世所嫉明宗崩居儉以故事爲禮儀使居儉以祖諱蠡辭不受宰相馮道卽徙居儉爲祕書監居儉歷兵吏部侍郎尙書左丞戶部尙書晉天福四年卒年七十贈右僕射居儉拙於爲生居顯官衣服常乏死之日貧不能葬聞者哀之

新五代史

張礪字夢臣磁州滏陽人祖慶父寶世爲農礪幼嗜學有文藻唐同光初擢進士第尋拜左拾遺直史館會郭

崇韜伐蜀奏請礪掌軍書蜀平崇韜爲魏王繼岌所誅時崇韜左右親信皆懼禍奔逃惟礪詣魏王府第慟哭久之時人皆服其高義及魏王班師礪從副招討使任圜東歸至利州會康延孝叛圜奉魏王命迴軍西討時礪獻謀於圜請伏精兵於後先以羸師誘之圜深以爲然延孝本驍將也任圜乃儒生也延孝聞圜至又覩其羸師殊不介意及戰酣圜發精兵以擊之延孝果敗遂擒之以歸四月至鳳翔內官何延嗣奉莊宗命合誅延孝監軍李延襲聞洛中有變故留延孝圜未決礪謂圜曰此賊構亂遂致凱旋差晚明公血戰擒賊安得違詔

養禍公若不決余自殺此賊任圖不得已遂誅延孝天
成初明宗知其名召爲翰林學士再丁父母憂服闋皆
復入爲學士歷禮部兵部員外郎知制誥充職未幾父
之妾卒礪以妾久侍先人頗亦敬奉諸幼子亦以祖母
呼之及卒礪疑其事詢於同寮未有以對礪卽託故歸
於滏陽閒居三年不行其服論情制宜識者韙之清泰
中復授尙書比部郎中知制誥依前充學士高祖起於
晉陽唐末帝命趙延壽進討自請行及唐軍敗於圍柏
谷與延壽俱陷於契丹隨至鎮州會契丹主卒永康王
北去蕭翰自東京過常山乃引鐵騎圍其第時礪有疾

方伏枕翰見礪責之礪抗聲而對辭氣不屈翰遂鎖礪
而去鎮州節度使滿達勒尋解其鎖是夜以疾卒家人
燼其骨歸葬滏陽礪素耿直嗜酒無檢陷契丹時曾背
契丹南歸爲追騎所獲契丹主怒曰爾何捨我而去礪
曰礪漢人也衣服飲食與此不同生不如死請速就刃
契丹主顧通事高彥英曰我常戒爾輩善待此人致其
逃去過在爾輩因答彥英一百其爲契丹主善待也如
此案遼史礪入契丹後太宗見礪剛直有文彩擢翰林
學士礪臨事必盡言無所避上益重之未幾謀亡歸
爲追騎所獲上責曰汝何故亡礪對曰臣不習北方土
俗飲食居處意常鬱鬱以是亡耳上顧通事高彥英英
乃謝礪平生抱義憐才急於獎拔聞人之善必攘袂以

稱之見人之貧亦倒篋以濟之故死之日中朝士大夫

皆嘆惜焉

舊五代史

司徒詡字德普清河人父倫本部督郵以清白稱詡少好讀書通五經大義弱冠應鄉舉不第唐明宗鎮邢臺詡往謁甚見禮遇命試吏於邯鄲歷永年項城合皆有能名長興初唐末帝鎮河中奏辟為從事未幾徵拜左補闕史館修撰秦王從榮之開府也朝廷以詡為戶部員外郎晉祖踐阼改刑部郎中充度支判官樞密直學士由兵部郎中遷左諫議大夫給事中充集賢殿學士判院事轉左散騎常侍工部侍郎歷知許齊亳三州事

漢初由吏部侍郎拜太子賓客世宗即位授太常卿以足疾致仕顯德六年卒年六十有六贈工部尚書

同上

重修廣平府志卷四十八

列傳三 宋至元

宋

范質字文素宗城人生之夕母夢神人授以五色筆九
歲能屬文十三治尚書教授生徒後唐長興四年舉進
士爲忠武軍節度推官遷封邱令晉天福中宰相桑維
翰深器之奏爲監察御史維翰出鎮相州歷泰甯晉昌
二節度皆請質爲從事維翰再相質遷主客員外郎直
史館歲餘召入爲翰林學士契丹侵邊少帝命漢祖等
十五將出征是夜質入直少帝令召諸學士分草制質

具草以進辭理優贍當時稱之漢初加中書舍人戶部侍郎周祖征叛每朝廷遣使齎詔處分軍事皆合機宜周祖問誰爲此辭使者以質對歎曰宰相器也物色得之喜甚時大雪解袍衣之且令草太后誥及議迎湘陰公儀注質蒼黃論撰稱旨迺白太后以質爲兵部侍郎樞密副使從征高平還加司徒宏文館大學士世宗初征淮南駐壽濠銳意攻取且議行幸揚州質以師老與王溥泣諫乃止及再駕揚州因事怒實儀罪在不測質入謁請見世宗起避之質趨前曰儀近臣也過小不當誅因免冠叩頭泣下世宗意遂解卽遣赦儀顯德六年

世宗北征質病留京師賜錢百萬俾市醫藥及平關南師還命質與王溥並參知樞密院事世宗不豫入受顧命恭帝嗣位加開府儀同三司封蕭國公宋初加兼侍中罷參知樞密奏薦呂餘慶趙普精通治道公忠堪倚乞授台司俾申才用帝嘉納之乾德初與張昭劉溫叟定南郊行禮圖帝尤嘉獎禮畢進封魯國公質奉表固辭不允二年正月罷爲太子太傅九月卒年五十四將終戒其子旻勿請諡勿刻墓碑太祖聞之爲悲惋罷朝贈中書令質性卞急好面折人以廉介自持未嘗受四方饋遺前後所得祿賜多給孤遺閨門之中食不異品

身沒家無餘貲太祖因論輔相謂侍臣曰朕聞范質止有居第不事生產真宰相也太宗亦嘗稱之曰宰輔中能循規矩慎名器持廉節無出質右者但欠世宗一死爲可惜爾從子校書郎杲求奏遷秩質作詩曉之時人

傳誦以爲勸戒

宋史列傳

范旻字貴參質子十歲能屬文以父任右千牛備身太守司議郎累遷著作佐郎宋初爲度支員外郎判大理正事俄知開封縣太宗時領京尹數召與語頗器重之嶺南平遷知邕州兼水陸轉運使俗好淫祀輕醫藥重鬼神旻下令禁之且割己奉市藥以給病者愈者千計

復以方書刻石置廳壁民感化之會南漢知廣州官鄧存忠劫土人二萬眾攻州城七十餘日旻屢出親戰矢集於胸猶激勵將卒殊死戰賊遂少卻病創日篤堅壁固守遣使十五輩求援廣州救兵至圍解賜璽書獎之病甚詔令有司以肩輿載歸闕下疾愈通判鎮州有能聲賜錢二百萬遷庫部員外郎開寶九年知淮南轉運事太祖謂曰朕今委卿以方面之重凡除民隱急軍須之務悉以便宜從事無庸一一申覆也歲運米百餘萬石給京師當時稱有心計太平興國初召爲水部郎中錢俶獻地以旻爲考功郎中權知兩浙諸州軍事上言

三司又兼吏部選事師還加給事中坐事貶房州司戶
量移唐州六年卒年四十六子貽孫上言詔復舊官貽
孫官至主客員外郎

宋史
列傳

李炳洺州肥鄉人從邢帥薛懷讓辟爲觀察支使懷讓
徙同州又爲掌書記歷邠州鳳翔判官拜殿中侍御史
知舒州太祖征金陵緣淮供億惟舒尤甚以勞加侍御

史卒

宋史李
沆傳

李沆字太初炳子少好學器度宏遠炳嘗語人曰此兒

異日必至公輔太平興國五年舉進士甲科爲將作監
丞遷右贊善大夫轉著作郎相府召試約束邊將詔書
旣奏御太宗甚悅命直史館雍熙三年召試除右補闕
知制誥以沆素貧別賜錢三十萬四年遷職方員外郎
召入翰林爲學士淳化二年判吏部銓嘗侍曲宴太宗
目送之曰李沆風度端凝眞貴人也三年拜給事中參
知政事丁艱起復知河南府眞宗升儲遷禮部侍郎兼
太子賓客詔東宮待以師傅禮眞宗卽位遷戶部侍郎
參知政事咸平初以本官平章事監脩國史會契丹犯
邊眞宗北幸命沆留守京師肅然眞宗還慰勞久之累

重刊唐書卷之八十八
加門下侍郎尙書右僕射真宗問治道所宜先沆曰不用浮薄新進喜事之人此最爲先問其人曰如梅詢曾致堯等是矣帝嘗語及唐人樹黨難制遂使王室微弱蓋姦邪難辨爾沆對曰佞言似忠姦言似信至如盧杞蒙蔽德宗李勉以爲眞姦那是也一夕遣使持手詔欲以劉氏爲貴妃沆對使者引燭焚詔附奏曰但道臣沆以爲不可其議遂寢駙馬都尉石保吉求爲使相復問沆沆曰保吉無攻戰之勞恐騰物議遂止帝嘗謂沆曰人皆有密啟卿獨無何也對曰臣待罪宰相公事則公言之何用密啟夫人臣有密啟者非讒卽佞臣嘗惡之

豈可效尤時李繼遷久叛判永興軍何亮上書言棄靈州有三患帝訪於沆沆曰繼遷不死靈州非朝廷有也莫若遣使密召州將使部分軍民空壘而歸如此則關右之民息肩矣帝不從未幾靈州陷帝由是益重之沆爲相王旦參政事以西北用兵或至盱食沆曰少有憂勤足爲警戒他日四方甯謐朝廷未必無事後契丹和親旦問何如沆曰善則善矣然邊患旣息恐人主漸生侈心耳旦未以爲然沆沒後真宗遂封岱祠汾大營宮觀蒐講墜典靡有暇日旦乃以沆先識之遠嘆曰李文靖眞聖人也當時遂謂之聖相寇準與丁謂善屢以謂

才薦於沆不用準後爲謂所傾始伏沆言沆嘗言居重
位實無補惟中外所陳利害一切報罷之此少以報國
爾沆爲相嘗讀論語或問之沆曰聖人之言終身誦之
可也景德元年七月沆待漏將朝疾作而歸明日駕往
臨問賜白金五千兩方還宮而沆薨年五十八上聞之
驚歎趣駕再往臨哭之慟廢朝五日贈太尉中書令諡
文靖乾興元年仁宗卽位詔配享眞宗廟庭宋史兼採宏簡錄
李維沆弟字仲方第進士爲保信軍節度推官眞宗初
獻聖德詩召試中書擢直集賢院以沆相避知歙州至
郡興學舍歲時行鄉射之禮沆沒入爲戶部員外郎契

丹請和以爲賀正旦使眞宗方幸西京維還詣行在具
言其待遇禮厚必保盟好擢兵部員外郎知制誥自是
每北使至多命維主之擢爲翰林學士承旨加史館脩
撰仁宗初再遷爲尙書左丞兼侍讀學士預修眞宗實
錄遷工部尙書會塞下傳契丹將絕盟復遣維往使其
主隆緒重維名館勞加禮使賦兩朝悠久詩詩成大喜
旣還帝欲用爲樞密副使或斥維賦詩自稱小臣乃寢
遷刑部尙書辭不拜引李士衡故事求換官除柳州觀
察使爲諫官劉隨所詆知亳州請赴本鎮改河陽久之
還朝復出知陳州卒維博學少以文章知名至老手不

廢書景德以後巡幸四方典章名物多爲所參定性寬
易喜愠不見於色獎借後進嗜酒善謔而好爲詩嘗曰
人生觴詠自適餘何營哉旣沒家無餘貲景祐元年贈
尙書右僕射子師錫虞部員外郎公謹太子中舍
宋史列傳
張美字元珪貝州清河人少善書計初爲左藏小吏以
彊幹聞特補本庫專知出爲澶州糧料使周世宗鎮澶
淵每有求取美必曲爲供給周祖聞之怒徙爲濮州馬
步軍都虞侯世宗卽位召爲樞密承旨時宰相景範判
三司被疾乃命美爲右領軍衛大將軍權判三司世宗
征淮南留美爲大內部署一日方假寐忽覺心動遽驚

起周視宮城少頃內醞署火起卽撲滅之俄眞授三司
使四年世宗再幸淮上皆爲大內都點檢北征又爲大
內都部署師還爲左監門衛上將軍充宣徽北院使判
三司美彊力有心計世宗連歲征討糧饋不乏深委賴
焉然以澶淵事頗薄之恭帝嗣位加檢校太傅宋初加
太尉初李筠鎮上黨募亡命多爲不法美度筠必叛積
粟淮孟間後筠叛太祖親征大軍十萬出太行經費無
闕美有力焉拜定國軍節度縣官市木關中同州歲出
緡錢數十萬以假民長吏十取其一謂之率分錢歲至
數百萬美獨不取未幾他郡有詣闕訴長吏受率分錢

者皆命償之乾德五年移鎮滄州太平興國初來朝改左驍衛上將軍美獻都城西河曲灣果園二蔬圃六亭舍六十餘區八年請老以本官致仕雍熙二年卒年六十八涇化初諡恭惠子守瑛至供備庫使孫士宗至內殿承制士宗卒士禹爲崇班士安至閣門祇候士宣爲

禮殿副使

宋史列傳

解暉洛州臨洛人父珪應募爲州兵後唐天成中西征至劍門沒於陣暉少有勇力以父死戎事隸兵籍戍雁門以功遷奉國軍隊長晉天福中安重榮反鎮州暉率壯士百餘人夜擣賊壘殺獲甚衆以功遷本軍列校周

廣順初劉崇與契丹侵晉州暉從都部署樞密使王峻等往援率敢死士三千餘夜襲契丹殺獲甚衆遷本軍第五指揮使從世宗征淮南率所部下黃州擒刺史高弼遷虎捷第一軍都虞侯宋初步軍都軍頭從征澤州力戰目中流矢師還策勳爲內外馬步軍副都軍頭建隆四年充湖廣道行營前軍戰權都指揮使潭州平降璽書獎諭僞統軍黃從志據岳州暉率舟師討平之改控鶴右第二軍都指揮使領高州刺史乾德六年詔領所部軍屯上黨從李繼勳略太原開寶九年破太原軍於境上斬首千餘級獲馬三十四匹改均州刺史太平興

國二年詔於潞州北築城名威勝軍以暉爲軍使從征并州與尙食使石彥贇率所部下隆州殺并州人三百餘擒招討使李詢等六人以獻於行在所賜予有加復令與彥贇督戰士隸城西行營分攻太原劉繼元降太宗以太原宮女三人賜暉俄以功遷本州團練使知霸州雍熙初充雲應寰朔忻代等州都巡檢使三年代歸本郡淳化二年被病上章告老改右千牛衛上將軍致仕詔未至而卒年八十暉鷙猛木強每受詔征伐常身先之人所憚者暉視之若甚易由是頻立戰功金創徧體時稱驍將子守顒至內殿崇班閣門祇候

宋史列傳

王明字如晦成安人晉天福中舉進士不第驍騎將藥元福爲原州刺史辟爲從事馮暉節制靈武表爲觀察巡官周廣順初元福領陳州防禦使奏署判官會劉崇寇晉州命元福將兵援之事多咨於明先是州縣吏送丁壯糧餉一夕夫盡遁去元福怒明入白元福曰今軍儲無闕丁夫數萬人文吏懦不能制斬之何益不如寬以待之賊敗凱旋公無專殺之名不亦善乎元福感悟盡免其死旣而崇眾宵遁卽命元福爲建雄軍節度留鎮因奏署明爲書記賜緋魚顯德初元福移鎮陝恃功多驕恣明以直道規之左右多毀明於元福明以父病

重刊廣平府志 卷四十八
求歸省元福數召明明謝絕之詣闕上書求任州縣歷
清平鄆城二縣令宋初荆南高繼冲授彭門節鉞以明
爲武甯軍節度掌書記乾德初召公卿近臣各舉清白
有吏幹者一人給事中馬士元薦明召爲左拾遺開寶
三年大舉南征以明爲隨軍轉運使供億不闕旣而賀
州未下明入與主帥計曰當急取之恐援兵至則我師
勝負未可知諸將猶豫明乃擐甲胄率所部直抵城門
城中懼遂開門納款因抵廣州賊眾十餘萬拒戰明與
都部署潘美等謀命丁夫數千人持二炬間道先搗
賊壘大軍蓐食陣以待之俄而萬炬皆發焚其柵賊驚

果來犯大軍因迎擊之賊大敗廣州平爲本道轉運使
太祖嘉其功擢授秘書少監領韶州刺史充轉運使俄
以明爲嶺南轉運副使明徧歷部內視民疾苦凡無名
科歛悉條奏除之嶺表遂安七年代歸帝召見勞問賜
襲衣金帶鞍馬是歲將用師南唐以明爲黃州刺史帝
密授成算明旣視事卽完葺城壘訓練士卒眾莫解其
意俄而王師自荆渚乘戰艦而下卽以明爲池州至岳
州江路巡檢戰權都部署屢有斬獲時南唐將朱令贇
自上江領眾十五萬連大艦沿流而下將焚采石浮梁
抵金陵爲援明率所部舟師屯獨樹口移檄諸軍相爲

犄角因督兵襲之至小孤山與諸軍合勢大破之擒令
贇金陵平詔明安撫諸郡因命知洪州太宗卽位兼領
江南諸路轉運使詔爲右諫議大夫充三司副使太平
興國七年與侯陟同判三司事八年改左諫議大夫爲
鹽鐵使遷給事中雍熙四年改光州刺史出知并州端
拱元年改禮部侍郎會契丹擾邊詔以明知正定府契
丹遁去淳化初詔歸闕知京朝官差遣事二年卒年七
十三子挺扶並進士及第歷臺省累爲轉運使皆知名
景德中錄幼子揆爲光祿寺主簿大中祥符八年又錄
其孫師顏爲三班借職揆至殿中丞

宋史
列傳

元達初名守旻洺州雞澤人身長八尺餘負膂力善射
家業農不任作苦委耒耜慨歎而去之事任俠縱酒嘗
醉見道旁槐樹拔劍斬之樹立斷達私喜曰吾聞李將
軍射石虎飲羽今樹爲我斷豈神助歟嘗從少年數十
百人欲起爲盜里中老父交戒之乃止時郡以戶籍調
役達當送徒闕下行數舍乃悉縱之曰吾觀汝曹亦丈
夫也豈樂爲是哉可善自爲計吾亦從此逝矣已而郡
遣追捕至則達援弓引滿待之追者不敢近由是亡命
山林間爲鄉里患太宗居晉邸時達求見得隸帳下嘗
侍太宗習射園亭命之射達射四發不中的已而連中

重刊唐平州志 卷四
上喜爲更其名曰達及卽位補御龍直隊長雍熙初累遷媯州刺史繼領本州團練使時州郡部送亡命者至關左右諷殺之達奏曰此類竄匿者衆豈能盡殺之哉不如赦之以開其自新之路且以成好生之德上悅因悉原之端拱二年擢侍衛步軍都虞侯領幽州刺史歷北面行營都部署由常山鎮入爲京城巡檢淳化四年卒年四十二贈昭化軍節度達雖奮自草野歷職戎署至交士大夫能折節盡禮人以是稱之

宋史列傳

趙瑫貝州清河人由衛士累遷龍衛指揮使亦以徐河戰功加鎮州團練使至兵馬部署至道二年卒於官年

七十贈歸義軍節度使

宋史列傳

郭密貝州經城人軀幹雄偉膂力絕人幼孤隨母適同郡王乙因冒姓王氏以知瀛州馬仁瑀薦隸晉王帳下給事左右太宗卽位補指揮使復姓郭氏至淳化間凡八遷移貝州駐泊兵馬部署會夏人寇邊以密有武略擢領安州觀察使充靈州兵馬都部署訓練士卒號令嚴肅夏人畏服邊境賴以甯謐至道二年卒年五十八贈保順軍節度

宋史列傳

李仲芳字秀之清河人淳化三年進士乙科授真定簿聽獄明斷歷遷冀州軍事判官當內召值契丹侵邊留

督軍餉轉大理丞乘傳治壁州疑獄復判冀州督餉遇
歲饑出庾粟貸民活數十萬家拜殿中丞判邢州薦為
御史不拜知光化軍作石隄以防漢水改知漢陽軍獄
空者二歲官至尙書屯田員外郎退居漢旁卒遂葬焉

舊志

田祚貝州人十世同居

通志 畿輔

淳化二年賜詔旌表

宋史

李玘大名宗城人性篤孝力耕以事母母卒讓田與其
弟堅遂廬於葬所晝夜號泣負土築墳高丈餘又以二
代及諸族父母藁葬者盡禮築之凡三年成六墳皆丈
餘不食肉衣帛不預人事皇皇然唯恐築之不及墳成

復留守墳二年常令兄之子賣藥以自給年六十餘足

未嘗入縣門鄉人目為李孝子天禧中知府張知白以

狀聞詔賜粟帛令府縣安存之里中有母在而析產者

聞玘被旌兄弟慚懼復相率同居

宋史孝義傳

張君平字士衡磁州滏陽人以父承訓與契丹戰死補

三班差使殿侍黔州指揮使獠兵屢入寇君平引兵擊

破之以功遷奉職除駐泊監押徙容白等州巡檢又以

捕賊功遷右班殿直謝德權薦君平河陰宰務擢閣門

祇候管勾汴口建言歲開汴口當擇其地得其地則水

湍駛而無留沙歲可省功百餘萬又請沿河縣植榆柳

爲令佐使臣課最及瘞汴河流屍悉從其言天聖初議塞滑州決河以君平習知河事命以左侍禁簽書滑州事兼修河都監旣而河未塞詔同提點開封府界縣鎮公事以嘗護滑州隄有功特遷內殿崇班君平以京師數罹水災請委官疏鑿近畿諸州古溝洫久之稍完遂詔畿內及近畿州縣長吏皆兼管勾溝洫河道自畿至泗州道路多羣寇君平謂兩驛增置使臣專主捕盜而罷夾河巡檢於是行者無患復爲滑州修河都監遷供備庫副使河平改西作坊使就遷鈐轄卒君平有吏材尤明於水利自議塞河朝廷每訪以利害河平君平且

死論者惜之錄三子官子鞏皇祐中以尙書虞部員外郎爲河陰發運判官管勾汴口嗣其父職云

宋史列傳

孟元字善長洛州人性謹愿少過頗喜讀書少隸禁軍以挽疆選補殿侍累遷散都頭班指揮使擢如京使并代州兵馬都監改鈐轄徙高陽關路又徙眞定路王則據貝州反元赴城下攻戰被數十創又中機石墜濠中旣出戰愈力更募死士由永濟渠穴地以進賊平改右騏驎使徙大名府路鈐轄河朔饑權知滄州民鬻鹽爲生歲荒鹽多不售民無以自給元度軍食有餘悉用易鹽民不轉徙御史中丞郭勸言其貝州功而賞未當乃

擢普州刺史遷宮苑使專管勾麟府軍馬事護築永甯堡敵不敢動爲龍神衛四廂都指揮使忠州團練使高陽關馬步軍總管遷天武捧日四廂都指揮使又遷步軍都虞侯眉州防禦使并代路副都總管判北京賈昌朝奏爲大名府路副都總管徙定州路遷馬軍都虞侯徙鄜延路行至鄭州卒贈遂州觀察使

宋史列傳

蘇宋字公佐磁州滏陽人擢第調兗州觀察推官受知於守杜衍爲大理詳斷官民有母改嫁而死旣葬輒盜其柩歸耐法當死宋曰子取母耐父豈與發冢取財等請而生之遷審刑院詳議御史臺推直官知單州提點

梓州益州路刑獄利路轉運使文州歲市羌馬羌轉買蜀貨猾馭上下物價肆爲姦漁宋議置折博務平貨直以易馬宿弊頓絕入判大理寺爲湖北淮南成都路轉運使擢侍御史知雜事判刑部使契丹還聞英宗晏駕契丹置晏仍用樂宋謂送者曰兩朝兄弟國家君臣之義吾與君等一也此而可忍孰不可忍遂爲之徹樂進度支副使以集賢殿脩撰知鳳翔還糾察在京刑獄又出知潭州廣州累轉給事中知河南府無留訟入知審刑院卒宋長於刑名故屢爲法官數以讞議受詔獎焉

宋史列傳

王臨字大觀成安人廣淵弟進士簽書雄州判官嘉祐初契丹使至朝論疑所應臨言取與之義不可不謹彼嘗求馴象可拒而不拒求樂章可與而不與今橫使求聖像果可與哉朝廷善其議治平中詔求武略用近臣薦知順安軍改河北沿邊安撫使上備禦數十策契丹刺口兩輸人爲義軍來歸者數萬或請遣還臨曰彼歸而我遣之必爲亂不如因而撫之詔從其言來者益眾契丹悔失計尋召對還文階終寶文閣待制知廣州府

卒

宋史列傳

李若水字清卿洺州曲周人原名若冰上舍登第調元

城尉平陽府司錄試學官第一濟南教授除太學博士蔡京晚復相子條用事李邦彥不平欲謝病去若水爲言大臣以道事君不可則止胡不取決上前使去就之義暴於天下顧可默默託疾而退使天下有伴食之譏耶又言積蠹已久致理爲難建裁損而邦用未豐省科徭而民力猶困權貴抑而益橫仕流濫而莫澄正宜置驛求賢解榻待士采其寸長遠見以興治功凡十數端皆深中時病邦彥不悅靖康元年爲太學博士開府儀同三司高俅死故事天子當挂服舉哀若水言俅以幸臣躡躋顯位敗壞軍政金人長驅其罪當與童貫等得

重刊廣平府志 卷四
全首領以沒尙當追削官秩示與眾棄而有司尋常習
故欲加縟禮非所以靖公議也章再上乃止欽宗將遣
使至金國議以賦入贖三鎮詔舉可使者若水在選中
召對賜今名遷著作佐郎爲使見粘罕於雲中纔歸兵
已南下復假徽猷閣學士副馮澥以往甫次中牟守河
兵相驚以金兵至左右謀取間道去澥問何如若水曰
戍卒畏敵而潰奈何效之今正有死耳令敢言退者斬
眾乃定旣行疊具奏言和議必不可諧宜申飭守備至
懷州遇館伴蕭慶挾與具還及都門拘之於沖虛觀獨
令慶澥入旣所議多不從粘罕急攻城若水入見帝道

其語帝明日幸金營過信而歸擢若水禮部尙書固辭
改吏部侍郎三年金人再邀帝出郊帝殊有難色若水
以爲無他慮扈從以行金人計中變逼帝易服若水抱
持而哭詆金人爲狗輩金人曳出擊之敗面氣結仆地
眾皆散留鐵騎數十守視粘罕令曰必使李侍郎無恙
若水絕不食或勉之曰今日順從明日富貴矣若水歎
曰天無二日若水甯有二主哉後旬日粘罕召計事且
問不肯立異姓狀若水曰上皇爲生靈計罪已內禪主
上仁孝慈儉未有過行豈宜輕議廢立粘罕指宋朝失
信若水曰若以失信爲過公其尤也歷數其五事曰汝

為封豕長蛇真一劇賊滅亡無日矣粘罕令擁之去反顧罵益甚至郊壇下謂其僕謝甯曰我為國死職耳奈併累若屬何又罵不絕口監軍者搥破其脣噴血罵愈切至以刃裂頸斷舌而死年三十五高宗即位特贈觀文殿學士諡曰忠愍死後有自北方逃歸者云金人相與言遼國之亡死義者十數南朝惟李侍郎一人

宋史列傳

李升永年人大觀時進士畿輔通志為吏以廉名靖康中

金人破汴以刃迫其父升前捍之以背受刃與父俱死

長子亦被害

宋史李芾傳暨李椿傳

孟忠厚字仁仲洺州人

案忠厚為元之曾孫舊通志作元之孫誤

隆祐太后

兄追封咸甯郡王彥弼子也后退居瑤華宮哲宗恩眷不衰故忠厚得以仕進宣和中官至將作少監靖康元年知海州召權衛尉卿金人圍城后宮火出居忠厚家由是免北遷金兵退張邦昌迎旨聽政后遣忠厚持書遺康王王即位授徽猷閣待制帝幸揚州除顯謨閣直學士臺諫交章論列帝以太后故難之太后聞命易武秩遂授常德軍承宣使幹辦皇城司未幾奉太后幸杭州苗傅亂平用趙鼎奏擢甯遠軍節度使尋奉太后幸南昌歸至越以母憂解職紹興九年判鎮江府改判明州兼安撫使復改判婺州三梓宮歸充迎護使及營佑

陵秦檜當為總護使憚往乃除忠厚樞密使以代其行
 檜與忠厚僚壻也然心實忌之山陵事畢忠厚欲歸樞
 密府檜諷言路論之遂判福州時州患海寇帝恐忠厚
 非帥才改判建康又改判紹興會郊赦加恩忠厚上表
 謝中丞詹大方希檜意論忠厚表辭輕侮罷為醴泉觀
 使檜死召還行在授保甯軍節度使判平江府復改判
 紹興過闕入見詔充萬壽觀使提舉秘書省二十七年
 卒贈太保忠厚奉昭聖太后訓避遠權勢不敢以私干
 太后之垂簾也忠厚乞裁節本家恩澤有夤緣者令三
 省執奏御史疏劾及檜當國其親每援以進忠厚獨與

之忤帝以太后故始終眷之卒後三子皆除直祕閣親

屬六人各進一官

宋史列傳

孟彥卿洛州人忠厚從父彥卿頗知兵為潭州通判建
 炎三年潭卒叛而東行帥臣向子諲命率兵追之遂招
 撫以歸未幾潰兵杜彥自袁州入瀏陽遂犯善化長沙
 二縣彥卿率民兵拒之手殺數人賊敗退屯瀏陽而所
 部忽自潰賊遂乘之彥卿被支解且持其首號於眾曰
 此善戰孟通判也事聞贈直龍圖閣官其家三人朱熹

帥湖南為立廟

宏簡錄

李椿字壽翁永年人父升死靖康之難椿年尚幼藁殯

佛寺深窳而詳識之奉繼母南走艱苦備嘗極力以養以父澤補迪功郎歷官至甯國軍節度推官治豪民僞券還陳氏田吏才精強人稱之隨張浚奔走淮甸綏流民布屯戍察廬壽軍情相視山水砦險要周密精審隆興元年春諸將有以北討之議上聞者事下督府既而師出無功椿知事不可爲勸浚去明年春浚出視師椿曰小人之黨已勝公無故去朝廷蹤迹必危復申前說甚苦浚心是之而不忍決去未幾果罷監登聞鼓院請通判廉州以歸上召對改知鄂州適歲祲官強民振糶且下其價米不至益艱食椿損所強糶數而不遏其直

未幾米舟湊集價減十二每行部必前期戒吏具州縣所當問事列爲籍單車以行所至取吏卒備使令凡以例致饋一不受言事者請下諸道爲式召爲吏部郎官論廣西鹽法孝宗是其說遂改法焉除樞密院檢詳小吏持南丹州莫酋表求自宜州市馬者因簽書張說以聞椿謂邕遠宜近故遷之豈無意今莫氏方橫奈何道之以中國地里之近小吏妄作將啟邊釁請論如法說怒椿因求去上慰諭令安職遷左司復請外除直龍圖閣湖南運副兼請十三事同日報可大者減桂陽軍月椿錢萬二千緡損民稅折銀之直民刻石紀之除司農

卿椿會大農力請歲儲二百萬斛爲一年之蓄擇臨安守椿在議中執政或謂其於人無委曲上曰正欲得如此人遂兼臨安府視事三月竟以權倖不便解去椿在朝遇事輒言執政故不悅出知婺州會詔市牛筋凡五千斤椿奏一牛之筋纔四兩是欲屠二萬牛也上悟爲收前詔除吏部侍郎又極言閹寺之盛曰漢唐勿論靖康明受之禍未遠嚴禁士大夫兵將官與之交通上聞靖康明受語感額久之曰幼亦聞此因納疏袖中以入最後極言當預邊備如欲保淮則楚州盱眙昭信濠梁渦口花壓正陽光州皆不可以不守如欲保江則高郵

六合瓦梁濡須巢湖北峽亦要地也以病請祠不許除集英殿修撰知甯國府改太平州賜尙方珍劑以遣旣至力圖上流之備年六十九上章請老以敷文閣待制致仕越再歲上念湖南兵役之餘欲鎮安之謂椿重厚可倚命待制顯謨閣知潭州湖南安撫使累辭不獲乃勉起至則撫摩凋瘵氣象一如盛時未滿歲復告歸進敷文閣直學士致仕朝拜命夕登舟歸老野塘上椿年十五歲避地南來貧無以爲養不得專力於學年三十始學易其言於朝廷措諸行事皆易之用巖然有守存心每主於厚尤惡佛老邪說淳熙十年卒年七十三朱

熹嘗銘其墓

宋史列傳

案舊志載有邯鄲人李淑攷宋史淑係徐州豐人李若谷之子今刪

金

董師中字紹祖洺州人少敏贍好學強記擢皇統九年進士第調澤州軍事判官改平遙丞捕殺劇賊王一素一境遂安時大軍後野多枯齒驛舍有遺櫬悉為葬之遷綿上令補尙書省令史右相唐括訛魯古尤器重之再考擢監察御史遷尙書省都事初師中為監察時漏察大名總管忽刺不公事及忽刺以罪誅削官一階降

授沁南軍節度副使累遷坊州刺史明昌元年選為陝西路副使坐修公廨濫支官錢罪以贖論及御史臺言其寬和有體召為大理卿御史中丞吳鼎樞舉以自代尙書省亦奏其才行遂擢中丞時西北路招討使宗肅以平章夾谷清臣薦知大興府事師中上言宗肅近以贓罪鞫於有司獄未竟不宜改除上納其言四年上將幸景明宮師中及侍御史賈鉉治書侍御史粘割遵古諫上不納師中等又上疏左補闕許安仁右拾遺路鐸亦皆上書論諫是日上御後閣召師中等賜對即從其奏遣罷北幸尋為宋生日國信使還以所得金帛遺親

舊五年上復如景明官師中及臺諫官各上疏極諫戶部尙書馬琪表舉自代擢吏部尙書初完顏守貞改爲西京留守朝京師上欲復用監察御史蒲刺都等糾彈數事師中辨其誣而舉守貞正人可用守貞由是復拜平章政事及守貞以罪斥出之以正失舉罪除陝西路轉運使歲餘徵爲御史大夫命與禮部尙書張暉看讀陳言文字踰三月拜參知政事進尙書左丞他日奏事上語輔臣曰御史姬端修言小人在側果誰歟師中曰應謂李喜兒輩上默然師中通古今善敷奏練達典憲處事精敏嘗言宰相不當事細務要在知人才振綱

紀但一心正兩目明足矣承安四年表乞致仕詔賜宅一區留居京師以寒食乞還家上冢許之且命賦寒食還家上冢詩每節辰朝會召入侍宴其眷禮如此泰和二年薨年七十四上聞之悼惜諡曰文定師中工文性通達疏財尙義平居則樂易真率其臨事則剛決挺然不可奪弟師儉初業進士欲籍其資廕師中保任之密令人代給堂帖使之肄業師儉感其義方力學後遂登第方在政府近侍傳詔將錄用其子師中奏曰臣有姪孤幼若蒙恩錄勝於臣子上義之以其姪爲筆硯承奉

金史
列傳

趙秉文字周臣磁州滏陽人幼穎悟讀書若夙習登大定二十五年進士第調安塞簿以課最遷邯鄲令再遷唐山丁父憂用薦者起復南京路轉運司都勾判官明昌六年入爲應奉翰林文字同知制誥上書論宰相胥持國當罷宗室守貞可大用章宗召問言頗差異有司論秉文上書狂妄法當追解上不欲以言罪人遂特免焉坐是久廢後起爲同知尙嵐軍州事轉北京路轉運司度支判官承安五年冬上顧謂張萬公曰趙秉文曩以言事降授聞其人有才藻工書翰又且敢言朕非棄不用以北邊軍事方興姑試之耳泰和二年召爲戶部

主事遷翰林修撰十月出爲甯邊州刺史三年改平定州前政苛於用刑而盜愈繁秉文爲政一從寬簡旬月盜悉屏迹歲饑出祿粟倡豪民以賑全活者甚眾大安初北兵南嚮召秉文與待制趙資道論備邊策衛王不能用其秋宣德果以敗聞尋爲兵部郎中兼翰林修撰俄轉翰林直學士貞祐初建言時事可行者三一遷都二導河三封建朝廷略施行之明年上書願爲國家守殘破一州以宣布朝廷恤民之意且曰陛下勿謂書生不知兵顏真卿張巡許遠輩以身許國亦書生也上以翰苑尤難其人不許四年拜翰林侍講學士言寶券滯

塞詔有司議行興定元年轉侍讀學士拜禮部尙書兼侍讀學士同修國史知集賢院事又明年知貢舉坐取進士盧亞重用韻削兩階因請致仕金自泰和大安以來科舉之文其弊益甚秉文爲省試得李獻能賦雖格律稍疏而詞藻頗麗擢爲第一舉人遂大喧噪愬於臺省以爲趙公大壞文格而秉文竟以是得罪五年復爲禮部尙書每進見從容爲上言人主當儉勤慎兵刑所以祈天永命者上嘉納焉哀宗卽位再乞致仕不許改翰林學士兼益政院說書官以上嗣德在初當日親經史以自裨益進無逸直解貞觀政要申鑒各一通正大

九年正月汴京戒嚴上命秉文爲赦文以布宣悔悟哀痛之意秉文指事陳義辭情俱盡及兵退大臣欲稱賀秉文曰春秋新宮火三日哭今園陵如此酌之以禮當慰不當賀遂已時年已老日以時事爲憂三月草開興

案哀宗紀注云是年本正大九年正月改元開興四月改元天興秉文草詔以三月非開興可知原文似誤

改元詔洛陽人拜詔畢舉城痛哭其感人如此是年五月壬辰卒年七十四積官至資善大夫秉文自幼至老未嘗一日廢書朝使至自河湟者多言夏人問秉文及

王庭筠起居狀其爲四方所重如此

金史列傳案歸潛志秉文幼年詩

與書皆法子端後更學太白東坡字兼古今諸家學及晚年書大進詩專法唐人魁然一時文士領袖壽考康

甯爵位士大夫罕及焉性疏曠無機鑿治民鎮靜不生
事在朝循循無異言家居未嘗有聲色之娛又云閑閑
以文字名一世於吏事非所長興定初尤虎高琪為相
惡士大夫有罪輒加箠杖在位者往往被苦俄命趙公
攝南京轉運司未幾果坐誤糧草事當杖既奏宣宗曰
學士豈當箠耶高琪曰不然無以戒後遂杖四十公大
憤其後高琪誅詔適當公筆首日君臣分嚴無將之罪
莫大夫婦義重不睦之刑何逃曾是一身兼此二惡人
謂趙公之仇雪矣又云正大初朝廷以夏國為北兵所
廢將立新主以趙公年德俱高且中朝名士遂命入使
冊之既行館閣諸公以為趙公此行必厚獲蓋趙素清
貧也至界上朝議罷其事飛驛卒遣追回卒既至趙所
先授以省符次白有禮部實封啟之乃楊公詩一首也
其詩云中朝人物翰林才金節煌煌使夏臺馬上逢人
唾珠玉筆頭到處灑瓊瑰三封書貸揚州命半夜碑轟
薦福雷自古書生多薄命滿頭風雪卻迴來趙公撫掌
大笑元好問趙閑真贊周旋於正廣道宗平叔之後
間而獨能紹聖學之絕業斂避於蔡無可黨竹溪之後
而竟推為斯文之主盟不立崖岸之謂和不置町畦之
謂誠不變燥溼之謂定不污泥滓之謂清藹然粹温見

於丹青雖無老成人尙有典型鳳衰無周龍移啟魏矜
粹攸屬古為悲秋人知為五朝之老臣不知其為中國
百年之元氣公無恙時辱公陶甄攜之提之且挽且前
萬馬之所馳不足以比公之轅萬折之所礙不足以迴
公之川將私其私耶抑以為文字之傳匠石斲斤子牙
絕絃千載一人猶以旦暮萬里一士且謂比肩念公生
平使我涕漣顏如渥丹雙瞳炯焉彼粹而温既與不
可傳者死矣觀乎此則又可以髣髴其足音之跼然

王礪字逸賓臨洛人博學能文不就科舉家無甌石儲

未嘗介意明昌中以馬惠迪薦為鹿邑主簿未幾乞歸

其詩為明昌詞人雅制中七人之一畿輔通志

王彧字子文沼州人承安中進士資剛決不可犯為尙

書掾知管差除與郎官相可否即棄官去往來登封盧

氏山中翦髮為頭陀改名知非字無咎自號照了居士

居二十年布衣蔬食自若也為文工於四六詩亦有功
既學佛作決定歌禪家以為證道新豐之後無有及者
當世號王隱居名甚高十餘年忽歸其家與妻子如舊
妻死再娶正大壬辰參知政事宗室思烈行臺洛陽以
知非有重名力致之使參議臺事城陷不知所終子升

卿有賦聲早卒

中州集參
歸潛志

劉政洺州人性篤孝母老喪明每以舌舐母目逾旬母
能視物母疾晝夜侍側衣不解帶刲股肉啖之者再三
母死負土起墳鄉隣欲佐其勞政謝之葬之日飛烏哀
鳴翔集邱木間廬於墓側者三年防禦使以聞除太子

掌飯丞

金史
列傳

潘希孟字仲明磁州人少擢第南渡為吏部主事遷翰
林修撰後病風疾卒為文條暢有法宣宗哀冊玉冊皆
其筆也

歸潛
志

王總管佚其名廣平人貌魁偉厚重寡言笑河朔板蕩
後艱阻備嘗不喜隨俗俯仰殫志於義理之學延師教
其子弟世以隱君子目之

畿輔
通志

曹珏字子玉磁州滏陽人性穎悟幼如成人及就舉選
有聲場屋間以兩廷試移籍太學時輩翕然推重之珏
厚重誠質居方城二十年教授為業方城人有倉猝避

吏留一金篋而去者珏勒家人毋視事定其人復來封
識宛然其廉介類如此正大末南京大司農楊公薦珏
等六人文章德行乞加官使以厲風俗事聞會兵動而
罷里中郭提控者喪亂中聚老幼數千守一寨自保人
有誣郭為亂者珏為便理之郭以無罪復居襄陰十年
尚書李仲臣為起廟學以師席奉之州人化其德文風
為之一變晚自號囂囂老人有卷瀾集三卷藏於家子
二人長國器次汝弼國器字大用端愿有父風沒於兵
士論惜之元好問
撰墓表

王禧永年人世業農歲得麥萬石金末入財佐軍興補

進義副尉元兵破永年將屠其城禧復罄家貲以助軍

費眾賴以免元史王
磐傳

案舊志金代列恩州人毛佺考金時恩州治山東歷
亭縣茲不錄

元

竇默字子聲初名傑字漢卿廣平肥鄉人幼知讀書毅
然有立志會國兵伐金被俘同時三十人皆見殺惟默
得脫歸家破母獨存驚怖之餘母子俱得疾母竟亡扶
病藁葬而大兵復至遂南走渡河依母黨吳氏醫者王
翁妻以女使業醫轉客蔡州又走德安孝感令謝憲子

以伊洛性理之書授之學自此始適中書楊惟中奉旨招集儒道釋之士默乃北歸隱於大名與姚樞許衡朝暮講習至忘寢食繼還肥鄉以經術教授由是知名世祖在潛邸遣召之默不得已乃拜命既至問以治道默首以三綱五常對又言帝王之道在誠意正心心既正則朝廷遠近莫敢不一於正一日凡三召與語奏對皆稱旨自是敬待加禮不令暫去左右世祖問今日之明治道者默薦姚樞卽召用之俄命皇子眞金從默學賜以玉帶鉤久之請南還命大名順德各給田宅有司歲具衣物以爲常世祖卽位召至上都問曰朕欲求如唐

魏徵者有其人乎默對曰犯顏諫諍剛毅不屈者許衡其人也深識遠慮有宰相才則史天澤其人也天澤時宣撫河南帝卽召拜右丞相以默爲翰林侍講學士時初建中書省平章政事王文統頗見委任默上書曰此蘇張之流也惟陛下察之他日默與王鶚姚樞俱在帝前復面斥文統曰此人學術不正久居相位必禍天下帝曰然則誰可相者默曰以臣觀之無如許衡帝不悅而罷文統深忌之乃請以默爲太子太傅默辭乃復以爲翰林侍講學士默俄謝病歸未幾文統伏誅帝追憶其言召還賜第京師命有司月給廩祿國有大政輒以

訪之默言三代所以風俗醇厚歷數長久者皆設學養士所致今宜建學立師博選貴族子弟教之以示風化之本帝嘉納之默嘗言君有過舉臣當直言都俞吁咈古之所尚今則不然君曰可臣亦以為可君曰否臣亦以為否非善政也至元十二年默年八十公卿皆往賀帝聞之拱手曰此輩賢者安得請於上帝減去數年留朕左右共治天下惜今老矣悵然者久之默既老不視事帝數遣中使存問焉十七年加昭文館大學士卒年八十五訃聞帝深為嗟悼厚加贈賜命有司護送歸葬肥鄉默為人樂易平居未嘗評品人物與人居溫然儒

者也至論國家大計面折廷諍人謂汲黯無以過之後

累贈太師封魏國公諡文正子履集賢大學士元史列傳

劉肅字才卿威州洛水人父深贈昭文館大學士邢國

公諡康穆錢大昕元史攷異肅金興定二年詞賦進士嘗為尚

書省令史案名臣事略肅先為新蔡令後為尚書省令史與傳異時盜內藏官羅

及珠盜不時得逮繫貨珠牙僧及藏吏誣服者十一人

刑部議皆置極刑肅止之曰盜無贓殺之冤金主怒有

近侍夜見肅具道其旨肅曰辯折冤獄我職也惜一己

而戕十一人之命可乎明日詣省辯愈力金主悟囚得

不死調新蔡令先時縣賦民以牛多寡為差民匿不耕

肅至命樹畜繁者不加賦民遂殷富繼擢戶部主事金
亡依東平嚴實辟行尙書省左司員外郎又改行軍萬
戶府經歷東平歲賦絲銀復輸綿十萬兩色絹萬匹民
不能堪肅贊實奏罷之漕渠決河間散水口役夫萬人
東平膺十之四主役者且築且塞工無已時肅請於朝
減其役尋亦罷軍儲糧歲輸新衛東平水運萬石至舊
衛再輦而南五十里肅具圖言於朝乞立衛州倉朝議
從之庚子世祖居潛邸以肅爲邢州安撫使肅行鐵冶
及行楮幣公私賴焉中統元年擢眞定宣撫使時中統
新鈔行罷鈔銀不用公私囂然莫知所措肅建三策一

曰仍用舊鈔二曰新舊兼用三曰官用新鈔如數易舊
鈔中書從其第三策遂降鈔五十萬貫城西南有隄堰
歲久缺壞肅急修之撤泐易土植柳其上秋水至無害
郡人德之二年授左三部尙書官曹典憲多所議定未
幾兼商議中書省事三年致仕給半俸四年卒年七十
六肅性舒緩有執守嘗集諸家易說曰讀易備忘後累
贈推忠贊治功臣榮祿大夫上國柱大司徒邢國公諡
文獻子憲禮部侍郎懋大名路總管孫賡自有傳

元史
參名

臣事
略

王磐字文炳廣平永年人金人遷汴乃舉家南渡河居

汝之魯山磐年方冠從麻九疇學於鄆城客居貧甚日

作糜一器畫爲朝暮食年二十六擢正大四年

案原史作至大

四年係元武宗年號下中統係元世祖年號不應入經仕在先登第在後史文恐誤通志改作正大今從之經義進士第授歸德府錄事判官不赴自是大肆力於經

史百氏文辭宏放浩無涯涘及河南被兵磐避難轉入

淮襄間宋荆湖制置司素知名辟爲議事官丙申楊惟

中被旨招集儒士得磐深禮遇之遂寓河南東平總管

嚴實興學養士迎磐爲師受業者常數百人中統元年

拜益州等路宣撫副使頃之以疾免李壇素重磐以禮

延致之乃買田泃河之上題其居曰鹿菴有終焉之意

及壇謀不軌磐覺之馳入京師因侍臣以聞世祖召見

嘉其誠節撫勞甚厚壇據濟南大軍討之帝命磐參議

行臺事壇平召拜翰林直學士同修國史出爲真定順

德等路宣慰使衡水縣達魯噶齊孟古岱貪暴不法縣

民苦之有趙清者發其罪旣具伏矣權要欲反其具獄

磐竟奏置諸法郡有西域大賈稱貸取息有不時償者

輒置獄於家拘繫榜掠其人且恃勢干官府磐大怒叱

左右摔下錘之數十時府治寓城上命擠諸城下幾死

郡人稱快時蝗起真定朝廷遣使者督捕磐親率役夫

走田間設法捕之三日而蝗盡滅使者驚以爲神復入

翰林為學士入謁宰相首言方今害民之吏轉運司為

甚至稅人白骨宜罷去以蘇民力由是運司遂罷阿合

馬案續通志作阿哈瑪特諷大臣請合中書尚書兩省為一拜右

丞相安童案續通志作安圖為三公陰欲奪其政柄有詔會議

磐言合兩省為一而以右丞相總之實便不然則宜仍

舊三公既不預政事虛設何為議遂阻案續通志云阿

七年立尚書省以阿哈瑪特平章尚書省事九年併尚書省入中書省以阿哈瑪特為中書省平章政事與百

官志相符本傳及安圖陳佑傳並云其事遂罷豈已罷而復行欺抑傳失其實歟

遷太常少卿乞致仕不允時宮闕未建朝儀未立凡遇稱賀臣庶雜

至帳殿前喧擾不能禁磐上疏令宣徽院籍兩省而下

百官姓名各依班序聽通事舍人傳呼贊引然後進其

越次者殿中司糾察定罰不應入而入者準闌入罪於

是儀制始定曲阜孔子廟歷代給民百戶以供灑掃復

其家至是尚書省以括戶之故盡收為民磐言林廟戶

百家歲賦鈔不過六百貫僅比一六品官終年俸耳聖

朝疆宇萬里財賦歲億萬計豈愛以六品官俸不以待

孔子哉且於府庫所益無多其損國體甚大時論韙之

帝以天下獄囚滋多惻然憐之盡原其罪他日命詞臣

作詔戒喻天下皆不稱旨磐獨以縱囚之意命辭帝嘉

獎不已再乞致仕不允國子祭酒許衡將告歸帝遣近

臣問磐磐言宜增益生員使之施教則庶幾人才有成
衡之受祿亦可少安矣詔從之磐以疾乞致仕帝遣使
慰諭之磐不得已復起帝將用兵日本問以便宜磐言
方今伐宋當用吾全力庶可一舉取之若復分兵東夷
恐曠日持久功卒難成江南既下朝議汰冗官權近以
按察司不便欲併省之磐奏曰貪官污吏侵害小民惟
賴按察司爲之申理若一例罷去則小民冤死無所訴
矣由是按察司得不罷朝廷錄平宋功遷至宰相執政
者二十餘人因議更定官制磐以爲有功者宜加遷散
官或賜五等爵號不宜任以職位日本之役師行有期

磐入諫曰日本小夷海道險遠勝之則不武不勝則損
威臣以爲勿伐便帝震怒明日復遣侍臣慰撫之磐以
年老累乞骸骨詔致仕進資德大夫仍給半俸終身磐
性剛方閑居不妄言笑每奏對必以正不阿順帝嘗以
古直稱之年九十二卒贈端貞雅亮佐治功臣追封洛

國公諡文忠

元史
列傳

張之翰字周卿號西巖邯鄲人中統初任洛磁路知事
至元中歷行臺御史以疾歸臺省交薦起爲戶部郎累
擢翰林侍講學士出知松江府減汰虛數漕米十萬石
又創西湖書院起先聖燕居樓復貢舉堂建松江小學

立上海縣學百廢俱興元貞二年卒於官舊志祀鄉賢子

野侍從皇太后奉旨注易授翰林院修撰邯鄲志

石高山德興府人父呼嚕古原作忽魯虎以侍衛軍從太祖

定中原太宗賜以東昌廣平四十餘戶遂徙居廣平之

洺水中統三年高山因平章塔齊爾原作察兒入見世祖因

奏曰在昔太祖皇帝所集安札爾博囉庫爾特依原作按察

兒字羅窟里台博囉漢巴圖庫庫布哈五部特默齊軍案錢大

攷異云庫庫布哈傳歲丙申太宗命五部將分鎮中原

庫庫布哈鎮益都濟南安札爾鎮平陽太原博囉鎮真

定實訥台鎮大名齊哩克台鎮東平齊哩克即庫庫特

未知孰是金亡後散居牧地多有入民籍者國家土宇未二

宜加招集以備驅策帝大悅即命與諸路同籍其數仍

命高山佩銀符領之四年授管庫總管鎮息州軍令嚴

肅寇不敢窺居四年邊境晏然賜金符以獎之至元八

年從取光州克棗陽進攻襄樊皆有功十年從阿木略

地淮上十一年從下江南以功升顯武將軍十二年丞

相伯延命以所部兵取甯國下令無虜掠既至城下諭

以禍福守者迎降復從至焦山與宋將孫虎臣張世傑

轉戰百餘里殺獲甚多以功賜金虎符進信武將軍鎮

高郵宋平巴延朝京師帝問有瘦而善戰者朕忘其名

巴延以高山對且盛稱其功帝即召見命高山自擇一

大郡以佚老而以所部軍俾其子領之高山辭曰臣筋力尙壯猶能爲國馳驅豈敢爲自安計帝從之進顯武將軍領兵北征屯伊圖山十六年命同和搭拉領三衛軍戍和林因屯田以給軍儲歲不乏用納延叛督戰有功授蒙古侍衛親軍都指揮使守衛東宮成宗憫其老以其子庫庫布哈襲職賜鈔三百錠大德七年卒於家

年七十六 元史列傳

吳鼎字國器永年人

元史作廣平人

元主求通書算學者郡以

鼎聞參謀漢地公事多所全宥至廣平籍戶定賦稱平允爲河南尹勸種植察奸匪設義倉立社學諸路咸取

法焉纂古今農桑輯要行於世改河北按察副使

史作燕南

提刑按察副使

揚厲風采不事苛細百職凜然朝廷將大用之

會疾卒於官追封壽國公諡憲穆

大清一統志參永年志

吳元珪字君璋鼎子簡重好深思凡征謀治法律令章程皆得於庭授至元十四年世祖召見授後衛經歷佩金符十七年從幸上都受命取御藥於大都萬歲山元珪乘傳未盡一晝夜而至帝奇其速擢樞密都事陞經歷嘗從同知樞密院事安巴進西番鎧甲帝問其制度元珪應對詳明帝益奇之初江南既定樞密奏裁定官屬京師五衛行省萬戶府設官有差均俸祿給醫藥設

學校置屯田多元珪所論建二十六年參議樞密院事
時繕修宮城尙書省奏役軍士萬人留守司主之元珪
亟陳其不便乃立武衛繕理宮城以留守段天祐兼都
指揮使凡有興作必以聞於樞府尋陞樞密院判官除
禮部侍郎遷左司郎中三十一年參議中書省事大德
元年除吏部尙書選曹銓注多有私其鄉里者元珪曰
此風不可長川黨朔黨之興宋所由衰也請謁悉皆謝
絕三年宣撫燕南劾貪吏若干人遷工部尙書河朔連
年水旱元珪言春秋之義以養民爲本凡用民力者必
書蓋民力息則生養遂生養遂則教化行而風俗美宰

相嘉其言土木之工稍息六年拜江浙行省參知政事
初朱清張瑄以財雄江南徧結當路及伏誅錄其家具
籍所交諸貴人而江浙省臣爲尤甚惟元珪一無所污
武宗卽位由僉樞密院事拜樞密副使詔議政中書皆
切於世務初詔發軍萬人屯田青海以實邊海都之亂
被俘者眾至是頗有來歸者饑寒不能存元珪具其事
以聞詔賜錢贖之帝在軍中卽聞元珪名至是特加平
章政事仁宗卽位詔議時政尋拜爲江浙行省左丞江
淮漕臣議檢覆江南田畝元珪固爭月餘不能止移疾
去延祐元年拜甘肅行省左丞歲餘召還俾宣撫遼陽

諸郡復為樞密副使召見嘉禧殿特加榮祿大夫賜鈔五千緡貂裘二襲元珪奏曰今經理江淮田土第以增多為能加以有司頭會箕斂民困日甚臣恐變生不測

非國之福詔遵舊制至治元年英宗即位案續通志云本紀英宗以

延祐七年三月位是歲十一月改明年元旦至治傳文誤又條上軍民利弊十餘事

帝並嘉納即降旨施行以年老致仕二年起商議中書

省事三年卒泰定元年追封趙國公諡忠簡三年復加

推誠佐理功臣光祿大夫司徒元史列傳

張思敬清河人性素清儉仕元蒙古軍站達魯花赤有

治績卒贈清河郡侯子天紀才力優贍官至台州總管

兼管內勸農畿輔通志參縣志

劉全洛水人從世祖入蜀數立戰功封元帥畿輔通志

秦起宗字元卿洛水人生長兵間學書無從得紙父順

削柳為簡寫以授之成誦削去更書學成辟武衛譯史

遷太子家令典簿官上言東宮官屬輔導德義財賦非

所治也朝廷是之拜中臺御史劾中丞和尚奏入不報

起宗又奏不罪和尚無以正國法帝曰為御史當如是

矣自是盡言無諱皆見聽用以兵部尚書致仕卒諡昭

肅元史列傳

劉恩字仁甫洛州洛水人後徙威州父辛歸國署貝州

長恩幼知讀書勇而有謀以材武隸軍籍累功爲百戶俄遷管軍總管佩銀符從入蜀數有戰功宋劉整將兵守瀘州中統三年都元帥紐璘遣恩諭整降以功易賜金符至元三年宋將據雲頂山欲取漢州恩率千人渡江與戰殺其將二人士卒三千餘人授成都路管軍副萬戶六年從平章賽典赤攻嘉定過九頂山與宋軍遇生擒其部將十八人械送京師賞賚甚厚九年從皇子西平王行省也速帶兒征建都恩將游兵爲先鋒一日三戰皆捷建都兵夜來犯圍恩禦之死者千餘人時師久駐食且盡恩畫策招諭沿江諸蠻得糧三萬石牛羊

二百頭士氣益振建都因山爲城山有七嶺恩奪其五斷其汲道建都窮蹙乃降入朝升管軍萬戶成眉州十二年移戍嘉定安西王遣使召恩至六盤山問曰江南已平四川未下奈何恩曰若以重臣之不徇私者奉詔督責之則半年可下矣王卽遣恩與府僚木兒赤乘傳以聞帝以爲然命丞相不花等行樞密院於西川授恩同僉院事十五年重慶降守將張萬走夔府以兵固守不花遣恩招之萬以城降旬月之間得其大小州邑六十四十六年入朝授四川西道宣慰使改副都元帥率蒙古漢軍萬人征幹端進都元帥宣慰使如故師次甘

州奉詔留屯田得粟二萬餘石十八年命恩進兵幹端恩設伏以待大敗之海都又遣八把率眾三萬來侵恩以眾寡不敵成師而還二十二年僉行樞密院事卒子

德祿襲成都管軍萬戶

元史列傳

何榮祖字繼先其先太原人金亡徙家廣平榮祖狀貌魁偉額有赤文如雙樹背負隆起有相者曰子位極人臣且壽相也何氏世業吏榮祖尤所通習遂以吏累遷中書省掾擢御史臺都事始折節讀書日記數千言阿合馬方用事奏為左右司都事以隸己欲因事中傷之未幾御史臺除治書侍御史又出為山東按察使有帖

木刺思者以貪墨為僉事李唐卿所劾帖木刺思乃告唐卿縱反詔榮祖與左丞郝禎參政耿仁傑鞠之榮祖得其情欲抵告者罪禎仁傑議以失口亂言罪坐之榮祖不可俄遷河南按察使二執政竟以失口亂言杖其人而唐卿之誣遂白平涼府言有南人二十餘輩叛歸江南安西行省欲上聞會榮祖來為參政止之曰何必上聞朝廷此輩去者皆人奴耳已而逃者俱獲果人奴也治以本罪而付其主於事明決多類此除雲南行省參知政事以母老辭又拜御史中丞復出為山東東西道按察使時宣慰使樂實姚演開膠州海道糧船遇暴

風多漂覆樂實督諸漕卒償之撈掠慘毒自殺者相繼按察官莫敢言榮祖曰第言之若朝廷見譴吾自當之卽草辭以奏詔免其徵召人爲尙書參知政事時桑哥專政人受其害榮祖數請罷之帝不從屢懇請不已至於忤旨不少屈未踰月而害民之弊皆聞帝乃思榮祖言召問所宜榮祖請於歲終立局考校人以爲便立爲常式詔賜鈔萬一千貫榮祖條中外有官規程欲矯時弊桑哥抑不爲通榮祖旣與之異議乃以病告特授集賢大學士未幾起爲尙書右丞桑哥敗改中書右丞奏行所定至元新格請改提刑按察司爲肅政廉訪司而

立監治之法又上言省部實爲根本必擇材而用之按察司雖監臨一道其職在於除蠹弊安斯民苟有弗至則臺省又當遣官體察之庶有所益帝深然之屢以老病乞解機務詔免署事惟預議中書而食其祿尋拜昭文館大學士預中書省事又加平章政事以水旱請罷不允先是榮祖奉旨定大德律令書成已久未及頒行適子祕書少監惠沒遂歸廣平卒年七十九贈光祿大夫司徒柱國追封趙國公諡文憲

案虞集諡議榮祖諡忠肅與傳異

榮祖身至大官而儼第以居上賜金五十兩銀五百兩鈔

二萬五千貫俾制器買宅以旌其廉

元史列傳

劉賡字載熙洛水人五世祖逸以郡吏治獄有陰德祖肅爲右三部尙書賡幼有文名師事翰林學士王磐至元十三年用薦者授國史館編修官十六年遷應奉翰林文字辟爲司徒府長史仍兼應奉補外同知德州事考滿擢太廟署丞太常博士拜監察御史是時御史中丞崔彧好盛氣待人他御史拜謁彧平受之獨見賡則待以上客大德二年陞翰林直學士六年奉使宣撫陝西由侍講學士陞學士至大二年遷禮部尙書仍兼翰林學士尋拜侍御史頃之還翰林爲學士承旨兼國子祭酒國學故事伴讀生以次出補吏莫不爭先出時有

一生親老且貧同舍生有名在前者因博士以告曰我齒頗少請讓之先賡曰讓德之恭也從其讓別爲書薦其人朝廷反先用之自是六館之士皆知讓之爲美德也皇慶元年遷集賢大學士仍兼國子祭酒延祐元年復爲承旨六年拜太子賓客七年復入集賢爲大學士尋又入翰林爲承旨泰定元年加光祿大夫會集議上尊號賡獨抗言其不可事遂已天曆元年卒年八十一賡久典文翰當時大製作多出其手以耆年宿德爲朝廷所推重云

元史列傳

趙宏偉字子英甘陵人至元十六年以書謁元帥宋都

解俾以兵屢立戰功歷衡州路總管府治中僉浙西道
肅政廉訪司事鎮江旱蠲民租九萬餘石大風海溢潤
常等州民乏食宏偉發粟賑之有司以未得報爲辭宏
偉曰民饑待斃擅發有罪我先坐全活者十餘萬人大
德中江南大饑請以贓罰錢賑之改浙東廉訪副使聞
許謙得朱子之學延致爲師終福建道肅政廉訪使卒
贈禮部尙書天水郡公諡貞獻子思恭天水郡侯元史列傳
案甘陵郡縣惟後漢時置在清河境元史地志無此
縣名或作史者仍沿古稱也姑因舊志存之康熙志
直書清河人或有所本

馬煦字得昌磁州人父和爲磁州提領勸農官以能見
推於時至元初煦補大司農史轉辟御史臺掾十五年
拜行臺監察御史時湖廣省臣託俘虜之籍私拏無辜
萬家無所詣煦按還之爲民時軍事未盡息江上運
輸方急督運者怙恣輒匿粟五萬斛自入而以風水爲
解煦抉而奪之還付吏秩滿遷江西提刑按察使行部
吉州劾治其暴橫者監州一人而親至學校禮其耆舊
進子弟而教之風化丕革佐江西幕時值行省復爲中
書盡去尙書舊吏獨留煦一人民有以叛告者長吏爲
震動而告者賄官宰亟捕治之煦持不可曰叛當有物

色蹤迹遽以一言大索比得實已破家非一人矣別遣所信吏往察果妄坐告者如法大德六年守濟甯至大元年移守湖州理冤獄均賦役精敏平允胡安定先生墓見奪於何山浮屠煦遷高原而祠之置守冢二家撤淫祀二百區興學校築塘灤嚴保伍懲豪縱蠲煩擾皆有成法延祐三年以戶部尙書致仕自號觀復道人卒年七十三

虞集撰
墓碑

李璋字君用磁州人至元六年朝廷舉兵攻襄樊璋以能通書計充軍府令史天下旣一擢廣西宣慰司都事從湖廣行省官往海外四郡建安撫司行省官狃於故

習任意輕殺璋執法抗議全活數百人以功陞化州路判官時仕者率由賄進璋以不阿媚左遷潭州澧陵縣尉二十一年遷湖廣省掾從鎮南王征交趾自陸路深入官軍失利獨璋所領百餘眾力戰三日獲其偏校以還詣闕條陳軍中利害請以戰艦由海洋擣其巢穴由是交趾內附元貞元年授承事郎爲興國尹明年妖賊煽亂大兵殄捕璋躬率義民嚮導徧榜諸鄉良民棄若甯家以別於賊而不罹玉石俱焚之禍寇平得崇信賊酋姓名簿百餘家璋憮然曰此愚民無識而然畀之於火民懷其德立祠報祀大德四年改授吉安隴泉尹修

學校正版權開墾荒田歲收三千餘斛存貯以備饑縣
瀕大溪當行人往來之衝造浮梁百餘丈至大元年授
承務郎撫州推官平反冤獄十餘行屬邑審囚咸稱其
平恕明決年未七十以疾致仕卒

吳澄撰
墓碑

張璧字國器清河人讀書有大志至元中以才幹薦歷

官平山元城縣尹綱紀大振以威州知州致仕

舊志

鄧朗肥鄉人至元中為武安尹剛方廉介政聲卓然

同上

王世鑑廣平人弱冠為揚州吏未幾改杭州所在以廉
能稱遷單父簿上察其能列之政府召讞獄山東會大
饑道殣相望觸法者眾世鑑按囚少疑者力為平反凡

所讞決自以為不冤官至山東都轉運鹽使

同上

胡郁字仲文肥鄉人成宗時為滿城令政尚簡靜均平
賦役節省浮費剖晰明敏果斷如流三年之間政化大

洽有遺愛碑

滿城縣志

郭文祚字允卿邯鄲人幼有奇節器宇嚴正為時輩推

重累官知潞州兼管本州諸軍奧魯勸農事

舊志

馬天驥字彥良磁州人博通經史以薦擢風憲彈劾無
所避嘗曰為天子耳目司而可傳會權要殺人乎仕至

治書侍御史

畿輔通志

高謙字舜臣磁州人釋褐將仕佐郎歷官常湖路總管

加吏部尙書纂述例格百八十冊同

安祐磁州人弱冠上書世祖言當世事帝即日召見與

語奇之授近侍官每使治事規模宏大條理不紊累官

集賢大學士卒贈平章政事興國公諡文康舊志

安思承磁州人歷仕清儉拜監察御史累官浙江陝西

山東等道肅政廉訪使卒追封武威郡公諡忠肅同上

李榮祖漳州肥鄉人爲益都推官至順間任遂州知州

多惠政民勒石誌美安肅縣志

元明善字復初清河人其先蓋拓拔魏之裔居清河者

至明善四世矣明善資穎悟絕出讀書過目輒記諸經

皆有師法而尤深於春秋弱冠游吳中浙東使者薦爲

安豐建康兩學正辟掾行樞密院時董士選僉院事待

之若賓友不敢以曹屬御之及士選陞江西左丞又辟

爲省掾會贛州賊劉貴反明善從士選將兵討之擒賊

三百人明善議緩誅誤得全活者百三十人旣又得賊

所書贛吉民丁十萬於籍者有司喜欲滋蔓爲利明善

請火其籍以滅迹二郡遂安陞掾南行臺未幾授樞密

院照磨轉中書左曹掾掾曹無留事仁宗居東宮首擢

爲太子文學及卽位改翰林待制與修成宗順宗實錄

陞翰林直學士詔節尙書經文譯其關政要者以進書

成每奏一篇帝必稱善興聖太后既受尊號廷臣請因肆赦明善曰數赦非善人之福宥過可也奉旨出賑山東河南饑時彭城下邳諸州連數十驛民餓馬斃而官無文書賑貸明善以鈔萬二千錠分給之曰擅命獲罪所不辭也還修武宗實錄又陞翰林侍講學士預議科舉服色等事延祐二年始會試天下進士明善首充考試官及廷試又為讀卷官所取士後多為名臣改禮部尚書正孔氏宗法以宣聖五十五世孫思晦襲封衍聖公事上制可之擢參議中書省事旋復入翰林為侍讀歲中拜湖廣行省參知政事又召入集賢為侍讀議廣

廟制陞翰林學士修仁宗實錄英宗親裸太室禮官進祝冊請署御名命明善代署者三眷遇之隆當時莫並焉至治二年卒於位泰定間贈資善大夫河南行省左丞追封清河郡公諡曰文敏一子晦蔭受峽州路同知元史 案元史攷證明善自撰元氏新阡表云二子馬祖常碑云長晦次高張養浩碑亦稱二子長晦次幼傳云一子史闕也董搏霄字孟起磁州人由國子生辟陝西行臺掾時天大旱從侍御史郭貞讞獄獲劇賊李謀兒尸諸市中天乃大雨入拜監察御史歷官所至理冤獄革弊政才譽益著稱於時至正十一年除濟甯路總管從江浙平章

教化征進安豐兵至合肥定林站遇賊大破之時朱皋固始賊復猖獗搏霄擊敗之遂復安豐十二年命搏霄攻濠州又命移軍援江南搏霄麾壯士突前斬殺數級而諸軍相繼夾擊之凡七戰追殺至清河坊賊奔接待寺塞其門而焚之賊皆死遂復杭州已而餘杭武康德清次第以平搏霄亦受代去徽饒賊復自昱嶺關寇於潛行省乃假搏霄爲參知政事俾復提兵討之搏霄進兵至叫口及虎檻遇賊皆大破之追殺至於潛遂復其縣治既又克復昌化縣及昱嶺關降賊將潘大齋二千餘人賊又有犯千秋關者搏霄伏兵城外皆授以火礮約

曰見旗動礮卽發已而旗動礮發兵乃盡出斬首數千級遂復千秋關未幾賊復攻獨松百丈幽嶺三關搏霄七戰而克之有斬賊與饒池諸賊復犯徽州賊中有道士能作十二里霧搏霄以兵擊之獲道士焚其妖書而斬之遂平徽州十四年除水軍都萬戶俄陞樞密院判官從丞相脫脫征高郵分戍鹽城興化賊巢在大縱德勝兩湖間凡十有二悉勦平之遂復安東十六年進兵泗州勦平北沙廟灣沙浦等砦朝廷嘉其功陞同僉淮南行樞密院事十七年濟南告急搏霄乃提兵援濟南大破之於是濟南始甯詔就陞淮南行樞密院副使兼

山東宣慰使都元帥仍賜上尊金帶楮幣名馬以勞之屬老且病請以其弟昂霄代領其眾朝廷從之未幾命搏霄守河間之長蘆十八年搏霄以兵北行且曰我去濟南必不可保既而濟南果陷適有使者奉詔拜搏霄河南行省右丞甫拜命毛貴兵已至因拔劍督兵以戰而賊突至搏霄前捽而問曰汝爲誰搏霄曰我董老翁也眾刺殺之無血惟見其有白氣冲天是日昂霄亦死之事聞贈宣忠守正保節功臣榮祿大夫河南行省平章政事柱國追封魏國公諡忠定昂霄贈推誠孝節功臣嘉議大夫禮部尙書上輕車都尉追封隴西郡侯諡

忠毅

元史列傳

李齊字公平廣平人家甚貧客於江南工辭章元統元年進士第一歷僉河南淮西廉訪司事移知高郵府有政聲至正十年盜突入府驛取十二馬去齊躬追謝長等殺之十一年州人秦觀保造兵仗將圖劫掠復獲而行誅十三年泰州白駒場亭民張士誠爲亂破泰州河南行省遣齊往招降被拘久之賊酋自相殺始縱齊來歸泰州平賊徒尙蠶聚俄陷興化縣行省使齊出守甓社湖夏五月乙未數賊入城一譟呼而省憲官皆遁齊急還救城賊已閉門拒我遂連興化接德勝湖舟艦四

塞蔓延入寶應縣已而有詔凡叛逆者赦之詔至高郵
不得入賊給曰請李知府來乃受命行省強齊往至則
下齊獄中齊益辯說士誠本無降意特遷延爲繕劄計
耳官軍諜知之乃進攻城士誠呼齊使跪齊叱曰吾膝
如鐵豈肯爲賊屈士誠怒扼之跪齊立而詬之乃曳倒
搥碎其膝而尚之論者謂大科三魁若秦不華沒海上
李黼隕九江洎齊之死皆不負所學云元史列傳
胡潤祖廣平人至正間知汝州勸農興學救災恤患時
郊令有誣民盜牛及民婦李氏誣服殺人者皆爲辯理
州民立碑誌德河南通志

李拱辰字廷弼磁州人以善譯得備宿衛授高郵判官
歷遷新昌歸安縣尹有廉能稱擢監察御史都事歷官
三十年家無留貲同上

高傅字起巖磁州人爲州團練萬戶赴調遇賊且戰且
行既賊大至傅引弓射皆中賊懾不敢前援兵不至賊
復合攻誘使降傅大罵力戰而死舊志

龐遵永年人母病腫三年不能起忽思食鯉遵求於市
不得歸途號泣忽有鯉躍入舟作羹以獻母悅而病瘥
趙思源雞澤人字巨川與兄思海弟思淵思泉俱以孝
友聞思源尤仁厚好施後以子瑄官贈雞澤縣尹

趙慶祥永年人博學多識遂於名理隱居不仕後遨遊

吳楚授教於湘潭間學者多宗之俱同上

案舊志元代列恩州人王士元蓋沿康熙志之譌茲

不錄

王士元字汝淵河南人善騎射能射石如飛且能且
三十年來無留贊
恩州人王士元蓋沿康熙志之譌茲
李對元字汝淵河南人善騎射能射石如飛且能且

